

ANG PASTOR UG ANG DIOS

Lesson 1: Importanti kaayo nga ang pangulu nakaila sa Ginoo (2 Hari 17)

Ang mga Israelita mao ang mga kaliwat ni Abraham. Gisa-aran si Abraham sa Ginoo nga mahimong dakung nasod ang iyang mga kaliwat ug makaangkon sila sa ilang kaugalingon yuta. Gisaad sad sa Ginoo kang Abraham nga ang tanang nasod sa kalibutan panalanginan sa Ginoo pinaagi sa iyang kaliwat.

Nahibalo ta sa kaagi sa mga Israelita. Nahimo silang dakong nasud didto sa Ehipto samtang mga ulipon pa sila sa Hari sa Ehipto nga si Paraon. Gidaogdaog sila ni Paraon pero giluwat sila sa Ginoo pinaagi ni Moises. Giluwat sila sa Ginoo gikan sa Ehipto ug gidala sa Canaan, ang yuta nga gitagana sa Ginoo kanila. Giabog sa Ginoo ang mga daan nga katawhan sa Canaan ug gipapuyo niya ang mga Israelita didto.

Sa kadugayan nanaghan ang mga Israelita sa Canaan ug nangayo sila ug hari, aron mahisama sila sa ubang mga nasod. Sumala sa nasulat sa Bibliya sa 1 Samuel, ang ilang gipangayo nakapasubo ni propeta Samuel. Pero ang Ginoo miingon kaniya, "Sige, tumana ang tanan nilang gihangyo; dili ikaw ang ilang gisalikway, kon dili ako." (I Samuel 8:7)

Busa, gitaga-an sila ug hari sa Ginoo. Ang unang hari sa mga Israelita mao si Saul. Dili siya maayo nga hari; wala siya mopatu-u sa Ginoo sa bug-os niyang kasingkasing. Ang ikaduhang hari mao si David. Ma-ayo siya nga hari ug su-ud ka-ayo siya sa Ginoo. Ang iyang anak, nga si Solomon maoy ikatulong hari. Sa sinugdanan pa, ma-ayo si Salomon; siya ang nagpatukud sa Templo sa Jerusalem, ug miingon sa Ginoo, "dinhi sa Templo, ihalad ninyo ngadto sa Ginoo ang mga mananap nga akong gisugo kaninyo." Sa panahon sa anak ni Salomon, si Rehoboam, nabahin ang nasod. Ang usa ka nasod nga Israel nahimong duha. Ang napulo ka tribo nagribildi kang hari Rehoboam ug sila nahimong Israel. Ang duha na lang ka tribo nahimong Juda.

Dinhi sa II Hari, Kapitulo 17:5-18, mabasa nato kon unsay nahitabo sa Israel.

Sa panahon ni Haring Hosea, gibuntog ang Israel sa mga taga Asiria. Si Hosea ang ilang kataposan nga hari. Nganong nabuntog ang Israel? Nganong wala sila luwasa sa Ginoo gikan sa gahom sa Asiria?

Sumala sa nasulat sa v 7 Nagpakasala sila sa Ginoo nga nagluwas kanila gikan sa Ehipto. Unsay ilang sala? Naghimo sila ug mga diosdios ug gisundog nila ang mga buluhaton sa kasikbit nga mga nasud.

Matud pa sa v 9 "Nagbuhat silag mga halaran sa mga diosdios sa tanan nilang kalungsoran, sa mga tore ug sa mga siyudad nga kinutaan; v 10, nagpatindog silag mga haligi ug tukon nga ilang giisip nga balaan sa tanang bungtod ug sa ilalom sa tanang kahoyng lunhaw."

Busa gipasulong sa Ginoo ang mga taga Asiria batok sa Israel. Niining paagiha, gisilotan ang Israel sa Ginoo sa ilang mga kalapasan.

Ngano man? Nganong gisalikway nila ang nagluwas kanila? (2 Hari 17:8, 15)

Sumala sa vv 8 ug 15, gisundog nila ang batasan ug buhat sa ilang silingan. Naghunahuna sila tingali nga tungod kay ang ilang silingan maoy karaang tawo sa maong dapita, tinuod ang ilang pagsimba, kay taga didto sila.

Pero aduna pay laing pangutana. Asa man ang mga magtutudlu sa balaod sa Israel? Wala ba sila makapahimangno sa mga Israelita sa ilang sala? Wala ba nila dasiga ang mga Israelita pagpadayon nga matinud-anon sa Ginoo?

Kinsa ang mga magtutudlo sa balaod didto sa Israel? Malachi 2:7

Basaha ang nasulat sa Oseas 4:4-6

Sumala sa gisulat niini, wala man ilha ang Ginoo sa mga pari sa Israel. Sila man unta ang motudlo sa balaod sa Ginoo ngadto sa mga Israelita. Gipili sila sa Ginoo aron sila ang mohalad sa mga mananap sa Templo ug motudlo sa balaod. Pinaagi sa mga pari ug sa mga propeta, masayran sa mga tawo kon unsa ang kabubut-on sa Dios; pinaagi unta sa mga pari, dili nila malimtan kon kinsay ilang Ginoo.

Pero tungod kay ang mga pari wala makaila sa Ginoo, wala pod makaila ang mga katawhan kon kinsay ilang Ginoo, kon unsay iyang kinaiya, kon unsay ilang mabuhat nga makapahimuot kaniya.

Basaha ang nasulat sa Jeremias 2:8; 10:21; 23:11. Unsa man ang mga pari?

1. Wala makaila sa Ginoo
2. Buangbuang
3. Daotan

Tungod kay ang kadaghanan sa mga pari ug mga propeta wala makaila sa Ginoo, ug gisalikway nila ang Ginoo, unsa pa kaha ang mga tawo wala makaila sa Ginoo.

Mahinungdanon kaayo ang mga pangulu ug ang mga magtutudlu sa usa ka nasud, sa usa ka grupo ug sa usa ka simbahan. Tinuod, nga ang tanang mga Israelita misalikway sa Ginoo ug nagsimba sa mga diosdios pero kon nagmatinud-anon unta ang mga pari ug ang mga propeta, magmatinud-anon pod ang ilang mga sakop.

Kita nga mga pastor, mga missionary, mga magtutudlu, bug-at ka-ayo ang atong katungdanan. **“Mga igsoon, pipila lamang kaninyo ang angay mahimong magtutudlo kay nasayod kamo nga kitang mga magtutudlo hukman sa mas higpit nga paghukom.” (Santiago 3:1)**

Tan-awa ang nahitabo sa mga Israelita; gibuntog sila sa ilang mga kaaway; gibihag ang uban; giilogan sila sa ilang mga balay, ug sa ilang uma. Pagka-alaot sa ilang kahimtang. Nabungkag na sila. Nawad-an sila ug kagawasan. Ang kinabuhi sa mga Israelita ana-a sa kamot sa ilang mga pangulu.

Kon simbahan ang atong hisgotan, mao man gihapon. Basaha ang gisulat ni Pablo kang Timoteo sa I Timoteo 4:16

Maluwas ang mamati sa atong panudlu kon magmatinud-anon ta pagtudlu sa kamatuoran bahin sa Ginoo ug sa iyang kaluwasan.

Walay sigurado nga ang usa ka grupo molungtad hangtud sa pagbalik ni Kristo. Adunay mga nasud dinhi sa kalibutan, nga kaniadto, daghan silag simbahan. Pero karon, wala na.

Diha sa kamot sa mga pastor ang kinabuhi sa simbahan ug ang importanti kaayo diha sa pastor mao nga nakaila siya sa Ginoo.

Lesson 2 Ang Ginoo lahi sa ubang mga dios sa kalibutan

Daghang tawong nagtu-u nga ang Dios sa Bibliya, usa ka dios lang siya sa kalibutan nga sama sa ubang mga dios. Adunay Kristohanon usahay, nga maengganyo nianang pagtulonan. Nagtu-u sila kang Jesus pero dili sila makatu-u nga siya lang usa ang manluluwas sa tanang katawhan sa kalibutan

Kaniadto, sa panahon ni Moises ug sa panahon sa mga hari sa Israel, daghan ang mga diosdios nga ginasimba sa mga katawhan nga nagpuyo sa mga nasod duol sa Israel. Usahay gibi-aybi-ay ang mga Israelita nga ang ilang Dios, walay mahimo (Salmo 42:3) ug natintal sila pagsimba sa mga diosdios sa ilang mga silingan.

Tun-an nato nag nahitabo sa Jeruslaem sa panahon ni Haring Ezequias.

Basahon nato ang 2 Hari kapitulo 18:28-35

Daghang nasod nga gibuntog sa hari sa Assiria. Daghang mga siyudad sa Juda nga iyang gisulong ug gigamhan (18:13). Sa kataposan, gipaadto niya ang iyang commander sa Jerusalem aron pagpugos sa mga tawo sa siyudad sa pagsurrender.

Unsay iyang gipasida-an sa mga tawo sa Jerusalem?

1. Ayaw pagpalimbong kang Ezequias kay dili siya makaluwas (18:29)
2. Ayaw'g tuo nga ang Ginoo makaluwas kaninyo (18:30)
3. Kon Ginoo ang inyong gisaligan, walay dios sa kalibutan nga nakaluwas sa ilang nasod gikan sa gahom sa hari sa Asiria (18:33-35); sa ato pa dili maluwas ang Jerusalem

Unsay sayop sa Commander? Giisip niya nga ang Ginoo sama sa na-andan niya sa iyang cultura, nga ang Ginoo nahisama sa ubang mga diosdios sa kalibutan.

Basahon nato ang 2 Hari 19:14-19.

Unsay gitu-uhan ni Ezequias nga hari sa Juda?

1. Ang Ginoo, dili lang dios sa Juda, kondili siya ang labawng dios sa tibuok kalibutan (19:15)
2. Gipangsunog sa hari sa Assiria ang mga dios sa laing nasod kay dili sila tinuod nga dios. Mga binuhat lang sila sa tawo gikan sa kahoy ug bato; mao nga nangaugdaw sila (19:17-18)
3. Maluwas sila aron masayod ang mga nasod nga ang dios sa Juda, mao ray dios sa tibuok kalibutan (19:19)

Nganong importanti ka-ayo ning doktrina?

Daghang tawo karon nga sama sa commander sa hari sa Assiria; nagtu-u sila nga ang dios sa Biblia, usa ka dios siya sa kalibutan, nga sama sa ubang mga dios.

Lesson 3: Ang Dios Magbubuhat

Paminawon nato ang pagbuhat sa Dios sa kalibutan (Genesis 1)

1. Unsay tinuuhan sa mga tigulang sa bukid bahin sa sinugdanan sa kalibutan ug sa tawo?

2. Unsay atong makat-onan dinhi bahin sa Ginoo ug bahin sa atong kinabuhi ug ang kinabuhi sa tanang binuhat sa kalibutan?

Ang kinabuhi sa tanan gikan sa atong dios. Taas gayod kaayo ang kahibalo sa tawo. Daghan ang iyang nahibal-an ug daku pod ang iyang mahimo. Pero walay pay tawo sukad nga nakahimo ni nakahatag ug kinabuhi sa bisan unsa. Ang tanang gibuhat sa tawo, walay ginhawa.

3. Unsay atong ikasulti bahin sa gimugna sa Ginoo?

Maayo kaayo ang tanan nga gibuhat sa Ginoo. Walay defecto, walay daot, walay sakit, walay luha, walay kamatayon.

4. Unsay klasi nga binuhat ang tawo; unsay iyang kala-inan sa ubang mga binuhat?

Sumala sa Genesis 1, lahi ang tawo sa ubang mga mananap nga gibuhat sa Ginoo. Gibuhat sa Ginoo ang tawo sama kaniya. Ang tawo nahibalo kon unsay maayo ug unsay daotan. Ang tawo makasimba sa Ginoo ug makatuman sa iyang kabubut-on.

5. Igunsa siya sa Ginoo?

Ang tawo, murag su-ud kaayo nga kauban sa Ginoo ug nahimo siya nga piniyalan sa tanan nga gibuhat sa Ginoo.

6. Igunsa man si Adan kanato?

Si Adan ang atong kagikanan kay sumala sa nasulat sa Bibliya, gibuhat sa Ginoo ang mga katawhan sa kalibutan gikan sa usa ka tawo. (Buhat 17:26)

7. Di-in man ang ubang mga dios sa pagmugna sa Dios sa kalibutan?

Siya lang usa ang nagbuhat sa tanan. Sa pagbuhat niya sa tanan, walay lain nga nagtabang kaniya.

8. Kon gikan sa Ginoo ang kinabuhi sa tanan, unsaon man nato pagkinabuhi?

Kon gikan sa Ginoo ang kinabuhi sa tanan, ang tanan mosimba unta sa Ginoo ug itugyan unta nila ang ilang kinabuhi pagbalik kaniya.

Lesson 4: Ang pagpakasala sa tawo ug unsay atong makat-onan bahin sa tawo ug sa Ginoo

Isaysay ngadto sa mga estudyante ang kaagi sa mga tawo gikan sa Genesis 3 hangtud sa pagtukud nila sa tore sa Babel sa Genesis 11.

1. Na-unsa ang lalaki ug babaye human nila ka-ona ang prutas sa kahoy? (3:22-24)

Naabli ang ilang salabotan ug naulaw kaayo sila sa ilang gibuhad. Sa Kaniadto ug bisan karon, kaulaw ang bunga sa dautang binuhatan. Gisaad ni Satanas nga maayo alang kanila kon mokaon sila sa bunga sa kahoy, pero kaulaw lang hinu-on ang ilang gibati.

2. Unsay resulta sa tanang katawhan sa kalibutan? (Roma 5:12; 1 Cor 15:21)

Ang tanang tawo sa kalibutan nahimong makasasala tungod sa sala sa ilang kagikanan nga si Adan.

3. Nganong nasuko ka-ayo ang Ginoo sa ilang gibuhad? Nganong wala niya sila taga-i ug kahigayonan pag-usab sa ilang batasan?

Dili sama sa tawo ang Ginoo. Matuman ang iyang gisulti. Dili siya magpahangyo sa tawo nga nakasala.

4. Unsay atong makat-onan dinhi bahin sa kinaiya sa Ginoo?

Balaan ang atong Dios ug matarong. Dili niya tugutan nga ang mga makasasala magpuyo duol sa iya (Salmo 5:4-5).

Lesson 5: Ang plano sa Ginoo pagluwas sa kalibutan ug pagpakita sa iyang pagpasaylo ug kaluoy sa tanang katawhan

Basahon nato ang Genesis 12:1-3

Unsay gipanaad sa Dios kang Abraham?

- *Mohatag ang Ginoo ug daghang kaliwat kang Abraham*
- *Ang iyang kaliwat mahimong dakung nasod*
- *Ang iyang mga kaliwat hatagan sa Ginoo ug yuta*
- *Mahimong bantugan ang ngalan ni Abraham*
- *Panalanginan sa Ginoo ang ubang nasod sa kalibutan pinaagi sa mga kaliwat ni Abraham*

Pero, ayha matuman ang gisaad sa Ginoo kong manganak si Sarai, asawa ni Abraham.

Isaysay ngadto sa mga estudyante ang kaagi sa mga kaliwat ni Abraham gikan sa kinabuhi ni Abraham hangtud sa ilang pag-abot sa Canaan sa panahon ni Josue.

Unsay kinaiya sa Ginoo nga iyang gipadayag pinaagi sa iyang pagluwas sa mga Israelita ug sa iyang paghatag sa balaod?

Exodo 15:11; Deuteronomio 4:35-39; Salmo 86:8-9.

Dios ang Ginoo nga dili sama sa mga diosdios sa kalibutan

Deuteronomio 10:14-19.

Siya ang Dios nga hari nga maglaban sa mga maluyahon, sa mga ilu ug sa mga dumuduong.

Exodo 3:7-10; Deuteronomio 7:7-11.

Nahigugma kaayo siya sa iyang katawhan. Tumanon gayod niya ang tanan nga iyang gisa-ad. Dili siya bakakon; kasaligan gayod siya.

Unsay atong makita bahin sa Balaod sa Deuteronomio 4:7-8?

Timailhan ang balaod nga daku ang pabor sa Ginoo sa iyang katawhan.

Pagabot sa mga Israelita sa Canaan, gitabangan sila sa Ginoo pagabog sa mga tawo sa yuta. Pero wala maabog ang tanang tawo. Kadugayan, gisundog sa mga Israelita ang mga taga Canaan ug gisimba nila ang ilang mga diosdios. Gipahimangno-an ang mga Israelita sa Ginoo pinaagi sa iyang mga propeta pero wala sila maminaw. Sa kataposan, gisilotan sila; gisulung sila sa laing nasod, nabihag sila ug nadala sa ilang nasod. Ang mga taga Israel gidala sa Assiria ug ang mga taga Juda nadala sa Babilonia.

Abi nila nga tungod kay sila ang tribo nga gipili sa buhing dios, dili sila maunsa. Abi nila nga dili sila silotan sa Ginoo kay anaa sa ila ang iyang templo.

Ang taga Babilonia, nada-ug sa mga taga Persia. Ang hari sa Persia misugut sa mga taga Juda pagbalik sa Jerusalem. Daghang namalik sa Jerusalem ug gitukud na pod nila ang Templo sa maong siyudara. Pero nagamhan gihapon sila sa taga Persia.

Kong tun-an nato ang kaagi sa mga Israelita atong makat-onan kon kinsay atong dios. Unsay iyang kinaiya; unsay iyang gikalipay, unsay iyang gikasuk-an, unsay iyang gikahimut-an ug unsay iyang gikasub-an. Mahinungdanon kaayo nga tun-an nato ang Bibliya kay pinaagi ni-ini maila nato ang atong Ginoo. Kay kon wala ta makaila sa Ginoo unsaon man nato pagtudlu sa mga magtu-tu-u sa atong simbahan. Unsa-on man nato sila pagpasunud sa Ginoo kong wala ta maka-ila kaniya.

Lesson 6: Ang Dios nagpadayag kanato sa iyang kinaiya ug sa iyang pagkadios pinaagi ni Jesus

Kinsa si Jesus? Anak sa Dios? Propeta sa Ginoo? Isa ka tig-sangyaw nga gipa-anhi sa Ginoo sa kalibutan?

Sumala sa mga muslim, propeta siya sa buhing Dios. Bisan si Moises miingon nga adunay umaabot nga propeta ingon kaniya (Deuteronomio 18:15). Tama ba kana, nga propeta lang siya?

Tun-an nato ang gibati sa mga tawo bahin kang Jesus.

Basaha ang Salmo 103:3 & Marcos 2:1-7. Nagtu-u ang mga Israelita nga ang Dios lang makapasaylo sa sala. Mao gyud nga natingala sila sa gisulti ni Jesus sa paralitiko. Nasuko ang mga magtutudlo sa balaod kay abi nila nga nagpasipala si Jesus sa Ginoo.

Basaha ang Salmo 65:7; 89:9; 104:6-9 & Marcos 4:35-41. Nagtu-u pod ang mga Israelita nga ang Ginoo lang ang makamando sa dagat ug sa hangin. Pero nabuhat pod kana ni Jesus; mao hinungdan nga nahibulong kaayo sila sa gibuhay ni Jesus ug nagpangutan-anay sila sila kon kinsa man kining tawhana.

Basaha ang Juan 14:8-10. Gusto si Felipe makigkita sa Amahan; gipasabot siya ni Jesus nga tungod kay nakakita siya ni Jesus nakakita na siya sa Amahan, kay si Jesus ana-a sa Amahan ug ang Amahan ana-a kaniya.

Basahon pod nato ang gisulat ni Pablo sa Colossas 1:15-20. Dili lang si Jesus usa ka propeta, o maayong tawo, o maayong magtutudlo. Siya ang dagway sa dili makita nga Dios. Sa wala pa buhata sa Dios ang kalibutan ana-a siya. Pinaagi kaniya, ug alang kaniya gibuhay sa Dios ang tanan. Makita diha kaniya ang tibuok kinaiya sa Dios ug pinaagi kaniya gipasiguli sa Ginoo ngadto kaniya ang tanang binuhat sa langit ug sa yuta.

Basahon nato ang Hebreo 1:1-2. Ang buot gipasabot niya nga si Jesus ang kataposang pinadayag sa Amahan. Pinaagi kaniya makalaro nato ang atong Dios. Si Jesus ang labaw sa tanan.

Nganong mas maayo siya nga pinadayag kay sa uban?

Galacia 3:10-14. Ang Balaod dili makaluwas kanato; kondili tunglohon ta kon mosalig ta sa atong pagtuman sa balaod. Naluwas ta ni Jesus sa tunglo sa Balaod.

Hebreo 7:23-27. Mas maayo siya nga pari ug mas maayo pod siya nga halad. Usa ka pari siya nga mabuhi sa walay kataposan; busa maka-ampo siya kanato kanunay. Mas maayo pod ang iyang halad kay gihalad niya ang iyang kaugalingon. Tungod kay tawo siya sama kanato, makapabuhi siya kanato gikan sa kahadlok sa kamatayon.

1 Juan 1:1-3. Mas klaro siya nga pinadayag kay sa uban, kay nakita siya sa mga apostoles, nadungog ug nahikap. Mitungha siya kanila ug sa walay duhaduha ilang gisangyaw ug gipamatud-an sa uban nga nabuhi siya. Kita pod sa walay duhaduha, ikasangyaw nato ang iyang ngalan kay tinuod ang atong dios; nabuhi siya ug naguban kanato.

Lesson 7: Ang pagila sa pastor sa Ginoo.

Dili husto kon ang pastor nasayod kon kinsa ang Ginoo pero wala siya makaila kaniya.

Basahon nato ang Mateo 7:21-23.

Unsay gibuhay sa mga tawo nga nagatubang kang Jesus?

Nakatudlo sila sa pulong sa Ginoo, nakahingilin sila ug mga yawa ug nakabuhay sila ug mga milagro sa ngalan sa Ginoo.

Unsa kahay kulang sa ilang kinabuhi?

Wala sila motuman sa kabubut-on sa Ginoo ug tungod ni-ini, ang Ginoo wala makaila kanila

Basahon nato ang Isaias 1:2-3. Gitandi ni Isaias ang mga Israelita ug ang mga baka ug asno. Mas nakaila ang mga mananap sa ilang tag-iya kay sa mga Israelita sa ilang Dios.

Pero ang katingalahan mao nga nagmatinud-anon sila sa mga relihiyoso nga kalihokan. **(Isaias 1:10-17).**

Nanghalad sila pero wala kahimut-i sa Ginoo ang ilang mga halad. Nagsunog sila ug insenso pero wala pod kana magustohi sa Ginoo. Nagmatinumanon sila sa pagsaulog sa Bag-ong Bulan ug sa Adlawng Igpapahulay. Pero, ngil-ad kini alang sa Ginoo. Nag-ampo sila pero wala maminaw ang Ginoo sa ilang pagampo.

Unsay gikasuk-an sa Ginoo kanila. Basaha ang Isaias 1:15-17. Aktibo sila sa mga buluhaton sa templo pero ang ilang kamot naduhig sa dugo. Wala nila buhata ang hustisya ug wala nila tabangi ang dinaugdaug. Gipasagdan lang nila ang mga ilu ug ang mga biyuda.

Nasulat sa Isaias 29:13 **“Kining mga tawhana nagpasidungog kanako sa pulong lamang, apan ang ilang mga kasingkasing halayo kanako.”**

Sa ato pa, adunay tawo usahay, nga aktibo sa mga buluhaton sa simbahan, pero pagkatinuod, wala siya ilha sa Ginoo ug wala pod siya makaila sa Ginoo. Ang kulang sa mga tawo sa Israel mao nga dili sila motuman sa mga sugo sa Ginoo bahin sa mga pobri ug sa hustisya. Mahimo pod ni mahitabo sa kinabuhi sa pastor.

Tun-an nato ang gisulat ni Jesus bahin sa pagpakigsu-ud kaniya. **Juan 15:1-17**

1. Unsay buot gipasabot ni Jesus nga siya ang punoan ug kita ang sanga?

Ang atong kinabuhi ana-a kang Jesus ingon sa kinabuhi sa sanga nga ana-a sa punoan sa kahoy. Pero ayha mabuhi ang kristohanon kon magpabilin siya kang Jesus, sama sa sanga nga mabuhi kon magpabilin diha sa punoan.

2. Unsay kahulogan sa pagpul-ong? **(15:2)**

Pul-ongon sa gardener ang mga sanga sa iyang sundang aron modaghan ang bunga sa kahoy nga prutas. Sa samang paagiha adunay mga pag-antos nga ipadangat sa Ginoo sa atong kinabuhi nga, bisan sakit kaayo, makapalig-on sa atong pagtu-u arong mahimo kitang mas epiktibo nga alagad.

3. Unsa-on man nato pagpabilin diha kang Kristo? **(15:9-10)**

4. Unsay hinungdan nga usahay kita nga mga sanga dili na magpabilin sa punoan?

ANG KINABUHI SA PASTOR

Ang Kinabuhi sa Pastor

Pasiuna

“Tinuod kining maong panultihon: Ang nagtinguha nga mahimong pangulu sa iglesia nagtinguha ug maayong buhat. Busa kinahanglan dili masaway ang pangulu sa iglesia.... (1 Timoteo 3:1-2)

Kining ikaduhang training bahin sa kinabuhi sa pastor. Adunay pastor nga nasakpan sa sala ug miingon siya, “tawo lang ako”; ang buot niyang gipasabot mao nga dili siya angayan nga sawayon kay nahisama lang siya sa ubang tawo, ug ang iyang gibuhat natural lang nga binuhatan sa tawo. Sa iyang hunahuna, walay kalainan siya sa laing tawo.

Tinuod nga tawo lang siya ug sama siya sa ubang tawo; pero ang pangulu sa iglesia, usa ka tinawag sa Dios. Kon ang Dios maoy nagtawag kaniya, kinahanglan nga ang iyang kinabuhi ug kinaiya subay sa gitudlu sa Ginoo.

Adunay tulo ka importante nga bahin sa tawag sa pangulu sa iglesia

1. Magtinguha siya nga mahimong pangulu, sumala sa 1 Tim 3:1. Dili man ang gipasabot ni Pablo nga maayo kon ang usa ka tawo mangandoy sa katungdanan sa pangulu sa mga hinungdan nga kalibutanon.
Maayo kon kini ang gipangandoy sa usa ka tawo kay balaan kini nga trabaho, nga mao ang pagatiman ug pagbantay sa mga katawhan sa Dios. Walay pulus kon mapugos ang usa ka tawo nga mahimong pangulu kon wala siyay hiyas pagdala sa simbahan o kon dili siya ganahan sa maong trabaho. Dili makalahutay ang tawo sa maong katungdanan kon wala siyay kalipay sa iyang trabaho.
2. Gitawag siya sa Dios. Gipahinumdom ni Pablo ang mga pangulu sa simbahan sa Efeso nga sila ang gitugyanan sa Espiritu Santo sa mga magtutuo (Buhat 20:28). Importante pod kaayo nga nakasinati ang pangulu sa tawag sa Ginoo sa iyang kinabuhi.
3. Giaprubahan siya sa mga membro sa simbahan. Sila ra ang makahukum kon dili siya salawayon.

Lesson 1: Ang Pastor, ulipon sa tanan.

Basahon nato ang Marcos 10:35-45

Ang pinakadaku nga tintasyon sa mga pangulu sa kalibutan mao nga gusto silang magpalabaw sa ilang kauban. Mas maibog ang mga pangulu sa katungod sa pagmando sa ilang isigkatawo kay sa kwarta.

Usahay, kini pod ang pangandoy sa mga pangulu sa iglesia sa Ginoo. Kini ang gipangandoy ni Santiago ug ni Juan sa Marcos 10:35-45. Abi nila nga inig-abot ni Jesus sa Jerusalem, himoon siya nga Hari sa mga tawo. Busa naghukum sila nga kon makauna silag hangyo kang Jesus, iya silang pilion nga iyang labaw nga opisiyales. Kana ang ilang gihangyo kay kana ang ilang namatikdan sa mga hari sa kalibutan nga palingkoron nila ang ilang mga labaw nga opisiyales sa ilang tuo ug sa ilang wala. Labaw sa tanan, gusto nila nga makapalabaw sila sa ilang mga kauban nga apostoles ug makamando sila .

Pero, tanawa ang tubag ni Jesus sa v 38. Unsay iyang buot gipasabot? Gisulti niya nga aduna siyay maagian ayha siya maka-angkon sa iyang mahimayaon nga gingharian. Ug basig dili nila makaya niining agianan.

Ang kahulogan niini mao ang pagantus ni Jesus sa krus; murag wala sila makasabot sa iyang gisulti, kay nanubag dayon sila "Oo" (Marcos 10:39)

Nagkanayon si Jesus pagsulti kanila nga moagi man gani sila sa iyang ma-agian nga pagantus, pero wala siyay katungod sa pagpili kon kinsay makalingkud sa iyang tuo ug sa iyang wala (Marcos 10:40)

Pagkadungog sa ubang mga apostoles sa gihangyo sa duha ka igsoon, nangasuko man sila. Busa gitudluan sila ni Jesus kon unsay klase nga pangulu ang gikinahanglan sa Dios sa iyang gingharian.

1. Mga tawo nga dili sama sa pangulu sa kalibutan. Abi nila nga ang kapanguluhan sa gingharian sa Ginoo sama sa ilang nakita sa kalibutan, nga ang katungdanan sa pangulu mao ang pagmando sa mga tawo nga ubus kaniya. Cultura ang ilang gibasehan sa ilang paghunahuna bahin sa katungdanan sa pangulu. Giingon ni Jesus, "dili kini mao ang paagi nga angay kaninyo." (v 43) Kumusta ang atong pagdumala sa mga membro sa simbahan sa MABCAM? Usahay, mahisama ta siguro sa mga politico sa kalibutan.
2. Gipasabot ni Jesus nga ang tawo nga buot mahimong labing dako kinahanglang moalagad sa tanan, o magpaulipon sa tanan (v 43-44). Unsay kinaiya sa ulipon? Dili siya makatrabaho sa iyang kaugalingon, kondili para sa iyang amu. Dili niya mahimo ang iyang gusto; dili niya mahimo nga maka-asenso sa iyang kaugalingong kinabuhi;

dili niya mahimo nga makapabantug sa iyang ngalan. Nangita pod si Jesus ug mga pangulu nga andam pagpaulipon sa ilang mga kauban nga kristohanon ug dili mangandoy sa pagpahita-as sa kaugalingon. Unsay atong buhaton aron matuman kini nga gipangandoy ni Jesus?

3. Si Jesus ang labing sumbanan sa pangulu nga moalagad sa tanan imbis nga alagaran. I-lista ang mga panahon nga si Jesus, bisan Ginoo siya, nagpaubus sa iyang kaugalingon alang sa uban.

Juan 13:1-17

Juan 21:1-9

Pero sumala sa gisulat ni Pablo, bisan sa wala pa siya magpakatawo, ana-a kang Jesus ang kinaiya sa ulipon. Basahon nato ang Filipos 2:5-11.

Bisan Dios siya, andam siya pagbiya sa iyang diosnong katungod aron matuman ang kabubut-on sa iyang amahan. Nagpaubos siya kutub sa kamatayon. Asa man kutub ang atong pagpangalagad sa Ginoo o sa atong isigkatawo?

Lesson 2: Ang Pastor ug ang iyang panimalay

Sumala sa nasulat sa 1 Timoteo 3:2,4-5 & Tito 1:6, ang pangulu sa iglesia usa ray asawa ug mahibalo siyang modumala sa iyang panimalay ug magmatinahuron ug magmasinugtanon kaniya ang iyang mga anak. Kay kon dili siya maantigong modumala sa iyang kaugalingong panimalay, unsaon man niya pagdumala sa iglesia sa Dios?

Ang Pastor ug ang iyang asawa

Una sa tanan, ang pastor usa ray asawa. Kini ang kabubut-on sa Ginoo alang sa tanang lalaki sa kalibutan (Genesis 2:24). Gusto sa Ginoo nga ang lalaki ug babaye mahimong usa. Giingon ni Jesus nga "silang duha mahimong usa" (Mateo 19:5); dili ang tulo mahimong usa ni ang upat mahimong usa. Ang duha lang mahimong usa.

Ang labing importanti nga pagtulon-an dinhi mao nga ang pastor kinahanglang magmatinud-anong mahigugma sa iyang asawa. Dili siya puedeng mangasawa sa laing babaye, ug dili pod puede nga maibog ni makighigala siya sa laing babaye. **"Angay pasidunggan sa tanan ang kaminyoon. Kinahanglang dili magmaluibon ang bana ug ang asawa kay hukman sa Dios kadtong makihilawason ug ang manapaw."** (Hebreo 13:4)

Sa unsang paagi nga ang bana mahigugma sa iyang asawa? Efeso 5:25-33; 1 Pedro 3:7;

Pagpakaon

Pagatiman

Paghatag ug panahon

Pastor sa panimalay

Unsay buhaton sa bana aron mahatagan ug maayong pagtagad ang iyang asawa? (1 Pedro 3:7) Unsay paagi nga usahay ang asawa pakaulawan sa iyang bana?

Dili singkahan ang asawa atubangan sa daghang tawo

Respetohan siya kanunay sa iyang bana

Ayaw isipa nga ang imong asawa maoy imong sulugoon

Unsay maayong maabtan sa usa ka pangulu kon nindot ang ilang kaminyoon?

Walay makadisturbo sa pangulu sa iyang katungdanan

Adunay makadasig kaniya kon may problema sa iglesia

Tahoron siya sa mga membro kon lig-on ang iyang pamilya

Ang Pastor ug ang iyang mga anak

Tan-awa ang panig-ingnan sa usa ka pangulu nga wala magdisiplina sa iyang mga anak. Si Eli (1 Samuel 2:12-17, 22-30; 3:11-13).

Mahinungdanon kaayo nga makadumala ang pangulu sa iyang pamilya, ilabi na sa iyang mga anak. Importanti nga dili masupilon ang iyang mga anak ug magmatinahuron sila kaniya (1 Tim 3:4; Tito 1:6). Sa ato pa, importanti nga makapanton siya kanila.

Ngano man nga usahay magpanuku ang mga ginikanan pagpanton sa ilang mga anak?

Naluoy daw sila sa ilang anak. Pero basaha ang Hebreo 12:11

Walay panaghiusa ang magtiayon bahin sa disiplina

Adunay laing paryenti nga molaban sa bata ug dili nila tugutan ang ginikanan pagpanton sa bata.

Nganong importanti nga mopadayon ta sa pagdisiplina?

1. Panultihon 23:13-14: *Kay maluwas ang mga bata pinaagi sa disiplina*
2. Panultihon 29:17: *Mohatag silag kalipay sa ginikanan kon pantanon sila.*
3. 1 Timoteo 3:5: *Ang mopanton sa iyang anak adunay katungod pagdisiplina sa mga membro sa simbahan.*

Lesson 3: Ang Pagdumala sa kaugalingon

Sumala sa nasulat ni Pablo sa 1 Timoteo 3:2, kinahanglang maugdang ang pangulu, mapugnganon sa kaugalingon ug mahigugmaon sa kalinaw.

Kining tulo ka kinaiya bahin sa pagpugong ug pagdumala sa kaugalingon. Kay ang tawong maugdang maoy makapugong sa iyang lawas ug sa iyang hunahuna. Ang tawo nga nahigugma sa kalinaw makapugong sa iyang kasuko ug sa iyang dila.

Usa siya makadumala sa iglesia sa Dios, kinahanglang modumala siya sa iyang kaugalingon. Nasulat sa Panultihon 25:28 nga **“Kon dili ka makapugong sa imong kasuko, mahisama ka sa usa ka siyudad nga walay paril ug sayon rang atakihon.”**

Nganong importanti kaayo kining kinaiya? Kasagaran motrabaho ang pangulu ug walay mobantay kaniya. Kon dili siya makacontrol sa iyang kaugalingon mapakyas ang iyang pagalagad.

Unsay problema sa atong pagkatawo? Nganong kinahanglang pugngan nato ang atong kaugalingon? Unsay kasulbaran sa problema? 1 Pedro 2:11; Lucas 9:23; Roma 8:13; 1 Cor 9:23-27

Adunay mga pangandoy ug kaibog nga gustong magmando sa atong kinabuhi; ug dili unta nato kining tagbawon o padaugon, kondili atong pugngan ug patyon. Kon dili nato pugngan ang mga law-ay ug tawhanong pangandoy, modala sila kanato sa kamatayon.

Mopugong ta sa atong kaugalingon aron gantihan ta sa giandam sa Ginoo kanato. Isipon nato nga ang atong pagkatawo sama sa usa ka mananap nga kinahanglang mansohon nato.

Unsay mga bahin sa atong kinabuhi nga kinahanglang atong pugngan? Basahon nato ang Efeso 4:25-30.

Ang dila; ayaw na kamo pamakak (v25 Col 3:9) ug ayaw paggamit ug daotang mga pulong (v 29) (Panultihon 10:19; 13:3; 17:27; Santiago 1:19)

Ang kasuko; ayaw na palungtara ang inyong kasuko sa tibuok adlaw (v26). (Panultihon 12:16; 15:1)

Ang kamot; ayaw pangawat, kondili pagtrabaho (v28).

Lisod ang pagpugong sa mga pangandoy sa atong lawas ug sa atong kasuko ug sa atong mga dila. Gamhanan gyud kaayo sila. Pero gisulat ni Pablo sa Galacia 5:22 nga ang pagpugong, usa ka bunga sa Espiritu Santo sa atong kinabuhi. Sa ato pa, adunay makatabang kanato pagpugong sa atong kaugalingon. Gisulat pod ni Pablo sa Colossas 1:29 nga samtang maghago ta, aduna say gahom gikan sa Ginoo nga maoy atong kusog. Kon wala ang iyang gahom, wala tay mahimo. Pero makapildi ta sa mga kailibgon nga nakigaway sa atong mga kalag (1 Pedro 2:11) pinaagi sa iyang gahom nga nagbuhat kanunay dinhi kanato (Filipos 2:13)

Lesson 4: Ang pastor dili hinapi; dili siya nawong ug kwarta (1 Tim 3:3; Tito 1:7)

Sa 1 Timoteo 6:5, gisaway ni Pablo ang mga tawo nga gustong magpadatu pinaagi sa relihiyon. Matud pa ni Pablo ang pagkamahigugmaon sa salapi maoy tinubdan sa tanang pagkadaotan ug daghang tawo nga nahiagom sa daghang kagul-anan tungod sa ilang tinguha sa sapi (1 Timoteo 6:10).

Nasuko si propeta Miqueas sa mga pari ug mga propeta nga nangalagad tungod sa kwarta (Miqueas 3:11), ug gihangyo ni Pedro ang mga pangulu nga dili sila magalagad tungod sa suhul (1 Pedro 5:2).

Pero didto lang sa siyudad adunay pastor nga dakug suwildu. Diyutay ra ang suwildu sa mga pastor sa bukid ug ang kadaghanan nila wala gayoy suwildu. Murag walay tawo nga magpastor sa bukid tungod sa dakung suwildu.

Pero, bisan dili sila madatu sa suwildu daghan gihapon ang mga pangulu nga nalit-ag tungod sa kwarta ug sa mga butang. Nadaot ang ilang kapangulohan.

Pananglitan:

Dili siya mobayad sa iyang utang sa simbahan ug sa laing tawo (Salmo 37:21)

Nawala ang sapi sa simbahan

Namakak siya bahin sa kwarta ug giilad niya ang mga membro; gihatag daw niya sa tawo nga anaa sa kawalad-on, o sa tawo nga nahospital. Pero pagkatinuod, naggasto sa kaugalingon (Buhat 5:1-6).

Dili siya motug-an kon unsay iyang gidapatan sa kwarta

Gibaligya niya ang butang nga dili iyaha

Unsay mabuhat sa mga pastor ug pangulu aron dili sila mahulog sa lit-ag ni Satanas?

1. *Ireport kanunay sa mga membro bahin sa kwarta sa simbahan*
2. *Itug-an kanunay ang tinuod bahin sa kwarta sa simbahan nga ilang gihatag kanimo para sa buluhaton sa iglesia.*
3. *Ipakita ang mga receipto ngadto sa tawo nga naghatag kanimo ug kwarta sa usa ka project.*
4. *Kanunay tumana ang mga balaod sa simbahan bahin sa kwarta; kon ginadili sa membro ang paghulam sa kwarta, ayaw paghulam. Kon mosupak ang pastor sa balaod, unsa pa kaha ang mga membro.*
5. *Bayari ang inyong utang sa mga tawo nga dili sakop sa simbahan; madaot ang ngalan sa simbahan ug sa Ginoo kon dili nimo bayaran ang imong utang.*
6. *Ayaw itabon ang bakak sa inyong mga sayop; kon nasayop ka na, itug-an dayon nimo ang imong sayop sa mga membro.*

Gisulat ni Pablo nga **“Gisalikway namo ang tanang tinago ug makauulawng mga buhat. Wala kami manlimbong ni magtuis sa pulong sa Dios. Nagkinabuhi kami diha sa kahayag sa kamatuoran atubangan sa Dios ug among gipaningkamotan nga ang mga tawo walay ikasaway kanamo.”** (2 Cor 4:2)

Ang tawo nga manlimbong, o mangilad o mamakak sa mga membro bahin sa kwarta, maghimo ug buluhaton nga iya sa kangitngit (1 Juan 1:6-7).

Labaw sa tanan, pamalandongan nato ang gisulti sa Ginoo bahin sa bahandi. Gisulat ni Pablo nga **“angay kitang makontento kon makakaon ug makabisti”** (1 Tim 6:8) Maayo gayod kon atong ikasulti sa gisulti ni Samuel sa kataposan sa iyang ministry—1 Samuel 12:3-4. Basaha pod ang gisulti ni Pablo sa Buhat 20:33-35.

Lesson 5: Maabiabihon ang pangulu (1 Tim 3:2; Tito 1:8)

Pinaagi sa pag-abiabi ang pangulu makatuman sa gisugo sa Ginoo sa mga Israelita sa dihang mihawa sila sa Ehipto. Gipahibalo sila sa Ginoo nga kinahanglang sila moatiman sa mga dumuduong sa ilang nasod (Deut 10:19) kay mga dumuduong pod sila kaniadto, sa didto pa sila sa Ehipto.

Basaha ang nasulat sa 1 Hari 17:8-24 bahin sa biyuda sa Sarefat nga mipakaon kang Elias, panahon sa gutom. Bisan gamay na lang ang iyang harina ug lana, gilutuan gihapon niya si Elias ug pan. Bisan pobri kaayo siya, wala siya magdumili pag-abiabi kang Elias. Gipanalanginan siya sa Ginoo sa iyang pagkamatinud-anon, kay wala siya kabsig pagkaon sa tibuok panahon sa gutom.

Bisan dili siya Israelita, mas maabiabihon siya kay sa mga Israelita ug matud ni Jesus, mas matinud-anon siya sa Ginoo, (Lucas 4:25-26). Imbis nga usa ka kaliwat ni Abraham ang midawat kang Elias ug mipakaon kaniya, usa ka langyaw hinuon ang nagtuman sa balaod sa Ginoo.

Sa panahon sa mga apostoles, adunay mga balay nga abtanan didto sa mga siyudad ug lungsud. Kini ang mga tulugan sa tawo nga nagpanaw. Pero, kasagaran ngil-ad, hugaw ug labing kuyawa ang mga abtanan. Usahay lugar sila sa mga daotang babaye, mga tulisan ug mamumunu. Busa importanti nga adunay mga pangulu nga andam kanunay pagdawat sa mga Kristohanon nga moabot sa ilang lungsud ug kinahanglan ug tulugan.

Gidayeg ni Juan si Gayo, nga nagsilbi sa mga alagad sa Ginoo pinaagi sa pag-abiabi; pero gisaway ni Juan ang batasan ni Diotrefes nga wala modawat sa mga kaigsoonan (3 Juan 5-10). Pinaagi sa pag-abiabi makaambit ta sa buhat sa mga tawo nga atong dawaton sa atong balay.

Mga pangutana para sa discussion

Unsay mga kaayohan nga ma-ato kon abiabihon nato ang mga sulugoon sa Ginoo? (Mateo 10:40-42; 25:35-40; Hebreo 13:2)

Kon dawaton nato ang alagad sa Ginoo, dawaton pod nato ang Ginoo. Basig anghel ang atong dawaton (Genesis 18:1-33)

Kinsay atong puedeng abiabihon sa bukid?

Mga kaigsoonan gikan sa laing mga barrio; mga biyuda

Unsay mga babag usahay sa among pag-abiabi?

Naghunahuna ang ubang pangulu nga dili sila makaabiabi sa mga bisita kay wala silay insakto nga ipakaon kanila. Ang uban, naulaw sa ilang balay. Ang uban walay gugma sa ilang isigka-magtutu-u.

Lesson 6: Dili palahubog ug dili pala-away, kondili malumo ug makigdaiton ang pangulu(1 Timoteo 3:3).

Ang tawo nga dili makapugong sa paginum, dili makabuhat sa iyang katungdanan sa hustong paagi.

Pananglitan:

1. Ang mga hari o pangulu nga moinum, makalimot sa balaod sa ilang nasod (Panultihon 31:4-5).
2. Ang uban, dili motarong paghukum ni dili makahatag sa hustisya tungod kay palainum sila (Isaias 5:22-23).
3. Ang mga propeta ug pari dili pod makahukum ug dili makatudlo tungod sa paginum (Isaias 28:7-8).

Unsay labawng hinungdan nga dili angayan nga mahubog-hubog ang mga pangulu sa simbahan ug unsay angayng buhaton sa iyang mga kauban nga pangulu?

Tungod sa kahubog, mag-away ang mga tawo ug makapakaulaw sa kaugalingon ug sa mga membro sa iglesia. Mabuhat niya ang dili angayng buhaton sa pangulu sa simbahan.

Giingon ni Pablo nga kinahanglan 'dili pala-away ug dili bangis' ang pangulu sa iglesia. Sa hunahuna ni Pablo kini ang unang rasun nga dili angayng mahubog ang mga pastor. Kay mas daling mag-away ang mga tawo nga nahubog na.

Ang batasan sa pala-away dili mamunga ug maayo para sa gingharian sa Ginoo. Gisulat ni Santiago nga ang kasuko dili makatabang sa pagkab-ot sa matarong nga kabubut-on sa Dios (Santiago 1:20).

Kon adunay problema sa simbahan ang tawo nga pala-away modugang hinuon sa problema. Tan-awa ang nasulat sa Panultihon 15:1.

Nahibalo ta nga masuko ang Ginoo tungod sa sala. Pero sumala sa Exodo 34:6, **"Dili ako daling masuko. Puno ako sa gugmang walay paglubad ug matinumanon."** Dugay siyang masuko ug dali rang mapuypoy ang iyang kasuko (Salmo 30:5). Pero ang tawo nga pala-away daling masuko ug daling makiglalis sa iyang kauban.

Gusto ni Jesus nga mahisama ta kaniya ug isangon nato ang iyang yugu, kay malumo siya ug mapaubsanon (Mateo 11:28-30). Basaha pod ang nasulat sa Mateo 12:19-20.

Kinsa ang mga bawog nga bugang ug nagkaawop nga suga nga atong masugat sa ministry?

Ang mga nabackslide; ang mga membro nga nahuyang tungod sa mga sala ug mga problema nga midangat sa ilang kinabuhi.

Sama kang Jesus dili natong daogon sila ni tamakan, ni ligsan. Dili nato dugangan ang ilang kasakit pinaagi sa mga sakit nga pulong.

Ang mga tigulang lalaki ug babaye (1 Tim 5:1-2).

Makigdaiton pod siya. Makigdait siya sa mga membro sa iglesia ug sa ubang mga leaders nga iyang kauban sa ministry. Mao gayod hinungdan nga malumo siya. Pero unsa pay ubang mga kinaiya nga nalakip sa "makigdaiton"?

Ang pangulu nga makigdaiton mapasayluon pod. Dili siya puedeng makigdait sa iyang isigkatawo kon dili niya pasayluon ang tawo nga nakasala kaniya o kon dili niya tabangan ang mga membro pagpinasayloay. Nagtudlo si Jesus bahin sa pagpinasayloay. Matud pa niya dili pasayluon sa Ginoo ang tawo nga dili mopasaylu sa iyang isigkatawo (Mateo 6:14-15; 18:21-35). Gitudlo pod kini ni Pablo (Efeso 4:32 & Colossas 3:13). Sumala sa Hebreo 12:14-15 ang panaghiusa sa mga anak sa Dios madaot sa tawo nga sama sa mapait nga lamas.

Unsay klase nga tawo nga sama sa mapait nga lamas?

Ang tawo nga dili makabuhi sa iyang kasuko o dumut ngadto sa iyang isigkatawo. Makahilo siya sa iyang mga kauban kon dili niya pasayluon ang tawo nga iyang gidumtan, sama sa mapait nga lamas nga mopait sa sud-an.

Nganong maglisod ang mga tawo mopasaylu sa ilang kauban, bisan ang mga Kristohanon?

ANG PASTOR MAGBALANTAY

Lesson 1: Ang Magbalantay

Usa ka klaseng hayop ang karnero; mahadlukun kaayo sila ug kong walay mobantay kanila panukbon sila kanunay sa nagkalainglaing klaseng bangis nga mananap. Dili gayod puede nga biya-an sila sa magbalantay samtang nanibsib sila sa kabukiran. Kay kong masapnan sila sa mga mapintas nga mananap nga walay magbalantay, panukbon ug magkatibulaag sila. Ang magbalantay maoy nagpanalipod kanila sa mga mananap. Basaha ang gibuhat ni David sa panahon nga magbalantay pa man siya sa mga karnero sa iyang amahan (1 Samuel 17:33-36; Juan 10:12)

Kasagaran ang mga manunukub mangitag tukbonon sa gabi-i, ug tungod ni-ini dad-on ang mga karnero kada gabi-i sa ilang magbalantay sa toril. Sulud sa toril walay mga mananap o dautang tawo nga makaunsa sa mga karnero nga gibantayan pa gihapon sa mga magbalantay (Juan 10:1-5; Lucas 2:8).

Ang magbalantay ray nahibalo kon asa ang maayo nga panibsiban sa mga karnero. Siya ray nahibalo sa lugar nga bag-o pa maulani diin may lunhaw nga sibsibanan. Tungod ni-ini ang magbalantay kinahanglang mag-una sa iyang mga karnero ug magtultul kanila sa maayong sibsibanan (Salmo 23:1-2; Isaias 40:11). Kon walay magtultul sa mga karnero dili sila makakaon ni makainum. (Genesis 29:3; Ezequiel 34:13-14)

Ang mga karnero kinahanglang mga magbalantay kay mahadlukun ug maluyahon sila. Dili sila makadefensa sa ilang kaugalingon. Pero kinahanglan pod sila ug magabalantay kay dali man silang mahisalaag (Ezequiel 34:6). Kon dili ang tanan usahay ang usa ka karnero masa-ag, hangtud mahilayo siya sa iyang kauban (Isaias 53:6; Lucas 15:4). Usahay ang mga nati maoy daling mawala; mao hinungdan nga usahay dakpon ug kugoson sila sa magbalantay ug dad-on pagbalik sa inahan (Isaias 40:11). Usahay mahulog sila sa lungag (Mat 12:11) ug masangit sa sampinit (Genesis 22:13). Ang uban magtamaktamak sa maayong sibsibanan hangtud mahugaw kini ug dili na makaon; ug ang uban maglubug sa tin-awng tubig pinaagi sa ilang hugawng tiil (Ezequiel 34:18-19).

Daghang mga Israelita nga nanginabuhi sa ilang mga karnero. Nakahimo silag bisti gikan sa balhibo sa ilang mga karnero; nakapalit sila ug yuta gikan sa halin sa kanding ug ang gatas mihatag ug pagkaon (Panultihon 27:23-27). Pero ayha sila mohatag ug kinabuhi sa ilang tag-iya kon atimanon silag maayo sa magbalantay

Sumala sa bibliya, unsay kinaiya sa maayo ug sa dili maayong magabalantay?

Ang kinaiya sa dili maayong magbalantay (Ezequiel 34:1-6; Juan 10:12-13)

Nagatiman lang sila sa ilang kaugalingon

Imbis nga sila ang mopakaon sa mga karnero kaonon hinuon nila ang karnero ug gihimo nilang bisti ang balhibo

Dili nila ayohon ang mga maluyahon ni ang mga masakiton.

Dili nila pangitaon ang mga nangawala ni dad-a pagbalik ang nahisalaag.

Dili nila bantayan ang karnero ug tungod niini panukbon sila sa mga mananap ug magkatibulaag

Biya-an nila ang karnero kon moabot ang mga ihalas nga mananap.

Ang kinaiya sa maayong magbalantay (Ezequiel 34:11-16; 1 Sam 17:34-37; Panultihon 27:23; Mateo 12:11; Lucas 15:4-5; Juan 10: 11,14)

Pangitaon niya ang mga nangawala

Pasibsibon niya sila sa maayong sibsibanan

Bantayan gayod niya sila aron makapahulay sila

Ayohon niya ang napiang

Kuhaon niya ang nahulog sa lungag

Pangitaon niya ang bisan usa nga nawala

Nakaila siya sa iyang karnero

Andam siya pagpanalipod kanila sa mga mananap.

Lesson 2: Ang Labawng Magbalantay

Sumala sa Bibliya ang Ginoo maoy magbalantay sa iyang katawhan (Isaias 40:10-11).

Basahon nato ang Salmo 23:1-4. Ilista ang mga paagi nga ang Ginoo sama sa usa ka maayong magbalantay sa karnero

Verse 1: Walay kakulangon ang iyang mga karnero; ang iyang karnero completo sa tubig ug pagkaon. (Salmo 37:25)

Verse 2: Makapahulay ang iyang mga karnero (Deut 12:10; Mateo 11:28)

Verse 3: Tabangan niya ang mga masakiton ug ang mga maluyahon (Lucas 4:18-19)

Verse 3: Magtultul siya kanila aron dili sila moagi sa dili husto nga dalan (Deut 4:5-6; Juan 8:12)

Verse 4: Tungod kay maayo ang iyang pagbantay, dili mahadlok ang iyang mga karnero bisan ana-a sila sa mahadlokong lugar (Roma 8:35-39; Filipos 4:19)

Sumala sa Juan 10, si Jesus pod ang maayong magbalantay. Ilista ang paagi nga si Jesus ang atong maayong magbalantay.

Juan 10:2-5: Nakaila siya sa matag usa kanato. Nakaila siya sa atong ngalan ug mailhan pod nato ang iyang tingog. Nakigsu-ud si Jesus sa iyang mga sakop.

Juan 10:11-17: Andam siya pagpakamatay sa iyang mga karnero; Nagpakamatay si Jesus kanato. Wala siya magpanuku pagluwas kanato gikan sa atong kaaway, pinaagi sa iyang kamatayon. Nahisama siya sa Magbalantay sa karnero nga dili mahadlok pagatubang sa leon o sa bangis nga lobo para maluwas ang iyang mga karnero.

Sa unsang paagi nga kita sama sa mga karnero nga nagkinahanglan ug magbalantay?

Isaias 53:6; 1 Pedro 2:25 Usahay mahisalaag kita kay mosimang ta sa husto ng dalan. Usahay mosubay ta sa atong kaugalingon nga kabubut-on ug tungod niini mangawala ta sa kangitngit.

Lucas 10:3 Isaias 53:6; 1 Pedro 2:25: usahay mahisalaag kita kay mosimang ta sa husto ng dalan. Usahay mosubay ta sa atong kaugalingon nga kabubut-on ug tungod niini mangawala ta sa kangitngit.

Lesson 3: Ang pangulu sama sa magbalantay sa karnero

Sa Daang Tugon, ang mga Israelita sama sa mga karnero ug ang Ginoo maoy ilang hari. Nagampo ang mga Israelita sa Salmo 80:1, "**Pamatia intawon kami, O Magbalantay sa Israel**". Basaha pod ang nasulat sa Isaias 40:10-11.

Ang mga hari sa Israel gitawag pod nga magbalantay kay sila ang nagdumala sa mga Israelita. Ang Dios nagpili kang David ug sumala sa Salmo 78:71 gihimo niya si David nga magbalantay sa Israel nga katawhan sa Dios. Ang mga propeta ug mga pari, gitawag pod nga mga magbalantay Sa Ezequiel 34. Gisaway sa Ginoo ang magbalantay sa Israel nga mao ang ilang mga pangulu, kay kulang ang ilang pag-atiman sa mga katawhan sa Ginoo. "**Tawo, sultihi ang mga pangulu sa Israel nga nagingon ang Ginoong Dios: Mga magbalantay sa Israel, nganong kamo man hinuon ang naniguro pagpangaon? Dili ba nga ang inyong katungdanan mao man ang pagpakaon sa mga karnero?**" (Ezeq 34:2)

Sa Bag-ong Tugon, si Jesus ang Maayong Magbalantay. Pagtan-aw ni Jesus sa mga Israelita giisip niya nga sama sila sa mga karnero nga walay magbalantay (Mateo 9:36). Ang pangulu sa iglesia sa Dios gitawag pod nga magbalantay. Sa Juan 21:15-17, gisugu ni Jesus si Pedro ug makatulo, pagatiman sa iyang mga karnero. Giisip ni Jesus nga ang iyang mga tinun-an maoy iyang mga karnero ug ang mga apostoles maoy ilang mga magbalantay

Sa 1 Pedro 5:2, gidasig ni Pedro ang mga pangulu pagatiman sa katawhan nga gitugyan sa Dios kanila. Sa v 3 gisulat ni Pedro nga kinahanglang mahimo silang maayong panag-ingnan sa mga membro nga ilang gibantayan, kay adunay panahon nga moabot ang Pangulong Magbalantay (1 Pedro 5:4). Gantihan sa Pangulong Magbalantay ang mga magbalantay nga nakabantay maayo sa ilang mga karnero.

Kitang mga pastor ug pangulu sa iglesia sa Dios maoy mga magbalantay sa iyang mga karnero. Tun-an nato ang atong mga katungdanan nga maoy katungdanan sa magbalantay.

Pagpanalipod sa mga karnero

Nasayod ta nga sa panahon sa Bibliya, adunay mga mapintas nga mananap nga magpanukub sa karnero. Ang magbalantay kinahanglang moabog sa mga bangis nga mananap ug moluwas pod sa mga karnero nga natukub na. Kini ang gibuhat ni David (1 Sam 17:34-37).

Unsay himan sa magbalantay? (Salmo 23:4)

Sungkod ug bunal; gigamit niya ang sungkod pagsangit sa mga nating nawala. Ang bunal maoy iyang gibunal sa mga mananap nga mitukub sa iyang mga karnero; ug iya pod kining gibunal sa mga tulisan ug kawatan.

Sa ato pa, gipanalipdan ang karnero sa magbalantay pinaagi sa pagpangita sa mga karnero nga nawala na. Gipanalipdan pod niya ang mga karnero pinaagi sa iyang pag-away o pagsukul sa mga kaaway sa karnero.

Kon simbahan ang atong hisgotan, unsay gipahimangno ni Pablo sa mga magbalantay sa simbahan sa Efeso? (Buhat 20:28-31)

Adunay nga mga tawo nga motungha sa simbahan sa Efeso ug sama sila sa mga mananap nga motukub sa karnero. Mga bakakon sila nga manlimbong sa mga membro sa simbahan.

Kon ang magbalantay adunay sungkod ug bunal pagdefensa sa iyang karnero, unsaon pagbunal sa pangulu sa simbahan ang mga kaaway sa iyang membro? (Efeso 6:17,18; Mateo 4:9-11; Galacia 2:11; Tito 1:10-13)

Ang Bibliya ug ang pagampo maoy atong hinagiban para makasupak ta ni Satanas nga sama daw usa ka liyon nga mangitag tukbunon (I Pedro 5:8-9). Kinahanglang dili mahadlok ang pangulu pagsukul sa mga tawo nga motudlu sa dili tinuod sa mga membro sa simbahan.

Lesson 4: Ang pagpakaon ug pagpainum sa mga karnero

Ang pangulu mogamit lang sa bunal kon nahasol ang iyang membro sa mga mini nga magtutudlo. Pero, sama sa mga magbalantay sa karnero, kon magmatinud-anon siya ug bantay sa iyang mga karnero, dili sila mopadani sa mga dili tinuod nga doktrina sa uban. Kon tumanon sa magbalantay sa karnero ang mga kasagaran niyang katungdanan, walay karnero nga mohawa sa iya. Unsay mga kasagarang katungdanan sa magbalantay sa karnero? Ang pagpakaon ug pagpainum sa iyang mga kahayopan.

Pareho sa pastor sa usa ka simbahan; kon magpadayon siya sa iyang kasagarang katungdanan, gamay lang ang mga membro nga mawala sa ilang simbahan. Unsay kinahanglang iyang buhaton nga sama sa pagpakaon ug pagpainum sa magbalantay?

Tito 2:1-3:

Itudlo ang mosubay sa hustong doktrina.

2 Tim 2:8-14:

Pahinumdumi ug pahimangno-i ang mga membro aron dili sila makiglantugi. Kay ang pagpakiglantugi bahin sa mga pulong makadaot sa pagtu-u sa mga tawo nga maminaw.

2 Tim 4:1-5:

Pagwali kanunay sa pulong sa Ginoo; daniha, badlonga, dasiga ug tudloi ang mga tawo. Importanti nga magpadayon ang pangulu sa iyang katungdanan, nga dili siya matandug sa mga dili tinuod nga pagtulon-an nga gipanawod sa uban. Importanti nga mobarog siyang ligon ug tumanon gihapon niya ang iyang katungdanan. Niining paagiha makaluwas siya sa iyang mga membro (I Tim 4:15-16)

Lesson 5: Pagpangita sa nawala; paglig-on sa maluyahon

Sa Lukas 15:2 nganong nagbagulbol ang mga Pariseo ug magtutudlu bahin kang Jesus?

Kay nagabi-abi siya sa mga tawo nga makasasala ug nakigsalo kanila sa ilang pagkaon. Ang mga Pariseo ug magtutudlu sa balaod nahugawan sa mga kubrador sa buhis ug sa ubang tawo nga giisip nilang makasasala.

Unsay gitubag ni Jesus? (Lucas 15:4-7) Ang gitubag ni Jesus mao ang samingay bahin sa karnero nga nawala. Sama daw si Jesus sa magbalantay nga mibiya sa 99 ka karnero sa sibsibanan ug nangita sa usa nga nawala. Nakigsalo si Jesus sa mga makasasala kay sama sila sa mga karnerong nawala. Ang buot ni Jesus nga ilang masabtan nga ang iyang pagpakigsalo sa mga makasasala mao ang paagi nga mangita siya sa mga tawo nga nawala. Sama sa magbalantay sa karnero, dili siya makaluwas sa karnerong nawala kon dili siya mangita kanila.

Sa ato pa, kinahanglang makigsalo ta sa mga tawong makasasala aron ato silang danihon sa Maayong Balita.

Sa Ezequiel 34:4 Nagreklamo ang Ginoo bahin sa mga pangulu sa Israelita. Unsay kulang sa ilang pagatiman sa mga Israelita?

Sama sila sa mga magbalantay nga wala moatiman sa mga maluyahon, wala mangita sa mga nawala ug wala mag-ayo sa mga nangabali-an . Samingay kini sa mga Israelita nga maluyahon sa ilang pagtuu, miundang pagsimba sa Ginoo ug ang uban na-abusado sa ilang mga kaaway. Nasuko ang Ginoo kay gipasagdan sila sa ilang mga magbalantay.

Kinsa ang mga maluyahon, mga nangabali-an ug ti-il ug ang mga nahisalaag sa atong kasimbahanan dinhi sa bukid?

Ang mga nabackslie

Ang mga nadiscorahi

Ang mga nasakitan tungod sa gibuhat sa laing tawo batok kanila

Kinahanglang maggunit ta sa atong sungkod ug mangita sa mga membro nga nahisalaag, nasakitan, nawala ug naluya na.

Magpraktis ta

Basaha ang kahimtang sa mga membro sa simbahan nga nasulat diri sa ubus. Nahisama sila sa mga karnero nga nawala, nagsakit ug nangabali-an ug ti-il. Himo-on ninyo kini nga mga drama aron makapraktis kamo sa pagpangita ug pag-ayo sa mga membro nga naluya na ug nasakitan.

1. Ang usa ka membro dili na magsimba kay gipasanginlan siya sa ubang tawo sa barangay nga siya daw ang nangawat sa manok sa iyang silingan. Bisan dili tinuod ang estorya, naulaw siyang pakita sa mga membro sa simbahan.
2. Ang usa ka membro nasubo kaayo kay namatyan sila sa ilang bata nga nalumos sa sapa.
3. Ang usa ka membro dili na mosimba ug mibalik na siya sa iyang nabatasan sa una; nagsige siyang sugal ug naghuboghubog na.
4. Ang usa ka magtiayon sa simbahan aduanay anak nga nasakit. Imbis nga paampoan nila sa mga membro sa simbahan, ilang gipakita hinuon ang bata sa mananambal. Tungod niini nagreklamo ang ubang mga membro sa simbahan ug dili na mosimba ang magtiayon.

Lesson 6: Ang kahimsug sa mga karnero

Sa dihang nakita ni Jesus ang mga tawo didto sa mga lungsud nga iyang na-agian, naluoy siya kanila kay murag mga karnero sila nga walay magbalantay (Mateo 9:36). Kining mga bersikulo nagpamatuod kanato nga ang kahimsug sa mga karnero ana-a sa kamot sa mga pangulu.

Nailhan sila ni Jesus nga mga tawo nga nakulangan sa leadership. Wala daw silay kadasig ug naluya pod sila. Nahasol sila ug nalibog ug walay kalinaw sa ilang panagtigom.

Sama sa mga karnero, ang mga kristohanon motubu ug mabaskog kon bantayan silag maayo sa ilang mga pangulu.

Unsay timailhan nga walay kakulangan sa mga karnero?

Kon completo sila'g pagkaon ug tubig, kon walay mga mananap nga naghasol kanila ug wala silay sakit, kontento ang mga karnero. Timailhan nga malinawon sila mao nga makapahulay o makahigda sila (Salmo 23:2; Ezeq 34:14).

Unsay timailhan nga malinawon ang usa ka simbahan? Walay away. Adunay panaghiusa ang mga membro. Nagtubu sila sa ilang pagtubu ug sa ilang pag-alagad. Dili sila matintal sa kalihukan sa ubang mga grupo.

Unsay pay mabuhat sa mga pangulu aron malinawon ang ilang simbahan?

1. Ang iyang kahagu alang sa mga membro, dili sa iyang kaugalingon (Ezeq 34:1-3).
2. Magampo siya kanunay sa mga membro (Colossas 4:12)
3. Mahigugma siya sa iyang mga membro (1Thess 2:6-9). Andam siya pagantus alang sa iyang mga membro
4. Dili siya absent; ana-a siya kanunay sa iyang simbahan. Dili makabantay ang pangulu kon absent siya kanunay sa iyang simbahan.
5. Maghusay siya sa mga problema sa simbahan (Ezeq 34:17-19)
6. Dili siya magpatintal sa mga sideline

ANG PASTOR MAGTUTUDLO

Lesson 1: Unsaon pagtudlo sa hustong paagi (2 Tim 2:15)

Gidasig ni Pablo si Timoteo nga maningkamot siya pag-ayo pagpahimuot sa Ginoo aron si Timoteo mahimong alagad sa Ginoo nga walay ikaulaw (v 15). Gisulat kini ni Pablo kang Timoteo tungod kay usahay ang pastor magpadayon pagpastor sa paagi nga iyang naandan, ug dili niya hunahuna-on kon kahimut-an siya sa Ginoo o dili. Murag wala siyay interest paguswag sa iyang pagtudlo.

Ang ubang pastor mas maningkamot pagpahimuot sa tawo kay sa Ginoo. Buhaton lang niya ang gusto sa iyang mga membro ug dili niya isipon kon ang Ginoo mahimuot sa iyang buluhaton.

Giingon ni Pablo nga mahimuot ang Ginoo sa magtutudlo nga magtudlu sa kamatuoran sa hustong paagi (v15). Sa ato pa, iyang itudlo ang kamatuoran aron makapahimuot siya sa Ginoo, dili sa tawo.

Gusto sa Ginoo nga maningkamot gayod ta paghingpit sa atong pagtudlo. Dili siya gusto nga mao lang gihapon ang atong paagi. Gusto niya nga wad-on nato ang mga paagi nga dili makauswag ug dili makahingpit sa atong pagtudlo.

Ang kinahanglang buhaton

1. Kon mahimo, pagsugud ka sa imong pagandam sa layo pa ang panahon sa imong pagtudlo. Pananglitan kon motudlo ka sa Domingo, mas maayo kon magsugud ka sa lunes pa.
2. Itudlo ang hustong pagtulon-an nga subay sa tinuod nga doktrina (1 Tim 6:3-4; Tito 2:1)
3. I-apply ang imong itudlo ngadto sa kinabuhi sa mga tawo nga mamati kanimo. Walay pulus kon daghan ang nahibaw-an sa mga membro pero dili sila maantigong magkinabuhi nga matarong. Gisulat ni Santiago nga, **“Ayaw limbongi ang inyong kaugalingon pinaagi sa pagpamati lamang sa pulong sa Ginoo; hinunoa, tumana kini.”** (Santiago 1:22) Basaha pod ang nasulat sa 1 Juan 2:4.

Kasagaran, dili makasabot ang mga membro kon unsay pulus ang pulong sa Ginoo sa ilang kinabuhi. Kinahanglan sila ug magtutudlu nga magpasabot kanila sa kahulogan sa pulong sa Ginoo ug itudlo kon unsaon nila pagtuman. Basaha ang Buhat 8:26-40. Ayha na nakasabot ang Taga-Etiopia kon unsay kahulogan sa iyang gibasa kon nakatudlu na si Felipe kaniya.

Gisulti ni Jesus, **“tudloi sila pagtuman sa tanan nga akong gisugu kaninyo.”** (Mateo 28:20)

4. Paghimo ug mga samingay nga makahulagway sa imong itudlo.
5. Itudlo ang tibuok kasulatan sa mga membro kay mapuslanon ang tanan alang kanila. (2 Tim 3:16)

6. Itudlo sa paagi nga makatukma sa kahimtang sa mga membro. Gisulat ni Pablo kang Timoteo nga **"Daniha, badlonga, dasiga ug tudloi nga mapailubon ang mga tawo."** (2 Tim 4:2)

Ang kinahanglang dili buhaton

1. Ayaw gamita ang imong katungdanan nga magtutudlo sa pag-ataki sa ubang tawo (Filipos 1:15-17)
2. Ayaw pagpasikat sa imong pagtudlo. Kon daghan ang nahibaloan sa usa ka magtutudlo matintal siya pagpahambug sa mga tawo sa iyang kaalam. Motudlo unta ang pastor tungod lang sa iyang pagkamahigugmaon sa tawo; kon mao, dili siya gusto magpahitaas sa iyang kaugalingon. Gisulti ni Pablo nga **"Ang maong kahibalo naghimo sa tawo nga mapahitas-on, apan ang gugma nagpalig-on."** (1 Cor 8:1)
3. Ayaw itudlo ang dili makab-ot sa mga tawo. 1 Corinto 3:1-3; Hebreo 5:11-14;
4. Ayaw pagtudlo aron pagpasunud sa mga tawo kanimo. Kay kon kana ang tumong sa usa ka magtutudlo, nga daghang tawong mosunod kaniya, kinahanglan itudlo niya ang gusto sa mga tawo, dili ang gikinahanglan sa tawo. Ilhanan gayod kana sa mga mini nga propeta (Pagbangotan 2:14) ug mini nga magtutudlo (Buhat 20:30).
5. Importanti nga klaro kaayo ang sinultihan sa magtutudlo aron makasabot ang mga tawo kon unsay iyang itudlo (1 Cor 14:6-12)
6. Ayaw dugangi ug ayaw bawasi ang pulong sa Ginoo. (Deut 4:2; 12:32; Panultihon 30:5-6). Hingpit daan ang pulong sa Ginoo; dili kinahanglang dugangan o kuhaan sa tawo aron mahingpit.
7. Ayaw pagtudlu kanunay sa imong mga faboritong bersikulu
8. Ayaw pagsimang sa topic nga imong itudlu. Ipabilin ang imong hunahuna sa mga bersikulu nga imong gibasa ug sa topic nga imong giandam. **CONCENTRATE!!**.

Teaching practice

Kini ang mga bahin sa kasulatan nga inyong itudlo sa training.

- 1.** Genesis 3:1-10
- 2.** Genesis 12:1-3
- 3.** Deut 4:35-39
- 4.** Deut 10:14-19
- 5.** 2 Hari 19:14-19
- 6.** Marcos 2:1-12
- 7.** Marcos 4:35-41
- 8.** Marcos 10:35-45.
- 9.** Roma 8:12-14
- 10.** 2 Cor 4:2
- 11.** Efeso 4:25-28
- 12.** Efeso 5:25-31
- 13.** Mateo 10:40-42
- 14.** Panultihon 23:13-14

Ang gusto sa inyong mastru

Nakasabot ka sa mga bersikulu nga imong gibasa

I-apply nimo sa kahimtang sa mga Manobo

Adunay maayong illustration

Kusog ang imong tingog

Lesson 2: Ang Pagtudlo—Katungdanan sa Hari ug uban mga pangulu sa Israel

Nasulat sa Deuteronomio 17:18-20 nga inigkahimong hari sa Israel, hatagan ang hari ug kopya sa balaod sa Ginoo. Kinahanglang magpabilin kaniya ang balaod ug iya kining basahon sa tibuok niyang kinabuhi. Makalampos siya sa iyang paghari sa Israel kon tumanon niya ang balaod sa Dios.

Pero ang katungdanan sa pagtudlu sa balaod, iya sa mga pari ug sa mga Levita. (Deut 33:10; Malaquias 2:7)

Basahon nato ang 2 Chronicas 17:1-11

Sumala niining mga bersikulo si Josafat nahimong hari, puli sa iyang amahan nga si Asa. Pagkahimo niyang hari sa Juda, mi-alagad siya nga matinud-anon sa mga katawhan sa Israel ug sa Ginoo. Gipanalipdan niya ang mga tawo sa Juda batok sa Israel (17:1-2). Wala niya taga-i ug pagtagad ang mga diosdios (17:3) ug gipangguba niya ang mga halaran sa laing dios didto sa kabungtoran sa Juda (17:6).

Dugang pa niana, nagpadala si Josafat ug pipila ka mga pari ug Levita ngadto sa mga siyudad sa Juda. Ang ilang trabaho mao ang pagtudlo sa balaod sa Ginoo ngadto sa mga lumulupyo sa maong mga siyudara (17:7-9).

Mao pa kadtong panahona nga adunay hari nga naghimo ug plano aron matudluan sa pulong sa Ginoo ang mga katawhan sa iyang nasod. Nakasabot man si Josafat nga ang kalamposan sa iyang paghari ug ang kaayohan sa iyang katawhan makit-an sa ilang pagkamatinumanon sa pulong sa ilang Dios.

Tungod sa gibuhat ni Josafat, nangahadlok sa Ginoo ang mga nasod nga kasikbit sa Juda. Ang mga tawo sa maong mga nasora nagpaubus kang Josafat ug gihatagan nila siya ug mga gasa ug pipila ka libo sa mga karnero ug kanding. (17:10-11)

Gipasidunggan ang Ginoo sa mga tawo sa laing nasod ug gipasidunggan pod ang mga Israelita tungod sa ilang pagmahal sa pulong sa Ginoo.

Kasagaran, unsa-on pagpasikat sa mga pangulu ang ilang pagkapangulu? Ang uban magpatukud ug daku nga building; ang uban mosulong sa laing nasod; ang uban mopadugang sa ilang kasundalohan ug ang uban mangasawa ug daghang babaye gikan sa laing nasod.

Pero lahi si Josafat. Wala siya magpahambug sa iyang pagkagamhanan; gipatudluan hinuon niya ang mga katawhan sa Juda sa pulong sa Ginoo. Nakasabot siya nga ang kauswagan sa nasod anaa sa kamot sa Ginoo ug kon magmasinugtanon sila sa balaod sa Ginoo magasenso pod sila. Nahibalo pod si Josafat nga ang pulong sa Ginoo ug ang mga magtutudlo maoy gikinahanglan sa mga Israelita.

Sa Bag-ong Tugon, aduna say hari nga nagpadala ug mga magtutudlo sa kalungsoran sa Israel (Lucas 10:1-24).

Unsay gibalaod ni Jesus sa iyang mga apostoles bahin sa ilang pagtudlo didto sa mga lungsud sa Israel?

- *Ginadili ang pagdala ug mga butang, bisan sandalyas*
- *Pagpuyo sa balay nga modawat kaninyo ug kan-a ang bisan unsa nga ilang idalit kaninyo.*
- *Ayoha ang mga masakiton ug tudloi sila nga hapit na ang paghari sa Dios.*

Tungod sa ilang pagtuman sa pulong ni Jesus, bisan ang mga yawa nagpaubus kanila (Lucas 10:17).

Sama sa nahitabo sa panahon ni Josafat, gusto ni Jesus nga ang mga katawhan sa tagsatagsa ka nasod sa kalibutan magpaubus kaniya. Maoy hinungdan nga nagpadala siya sa iyang mga tinun-an ug iya silang gisugu pagtudlo sa mga tawo sa tanan nga iyang gisugu kanila (Mateo 28:18-20).

Matuman ang kabubut-on sa Ginoo pinaagi sa mga magtutudlu sa iyang pulong. Kinahanglan siya ug mga magtutudlu nga andam pagpabilin sa usa ka simbahan ug kinahanglan pod siya ug mga magtutudlo nga andam pagtudlu sa iyang pulong ngadto sa nagkalainlaing tribo sa kalibutan.

Lesson 3: Pagtudlo— labaw sa tanang katungdanan sa pangulu

Daghang paagi nga nagpakita ang mga magsusulat sa Bibliya nga mahinungdanon kaayo ang mga magtutudlo alang sa kauswagan sa iglesia sa Dios.

- 1.** Basahon nato ang mga kinaiya sa pangulu nga gihan-ay ni Pablo sa 1 Timoteo 3:1-7. I-lista ang mga kinaiya nga kinahanglang ana-a sa pangulu ug ilista ang mga hiyas nga kinahanglang ana-a sa pangulu.

Daghang kinaiya nga gihan-ay ni Pablo kay mas importanti ang kinaiya kay sa hiyas. Usa lang ka buok ang hiyas nga gihan-ay ni Pablo; pagtudlo ang maong hiyas.

Daghang hiyas nga gipanghatag sa Espiritu Santo sa iglesia sa Dios (1 Corinto 12:4). Pero sumala sa kasulatan, kinahanglang nga ang hiyas sa pagtudlo ana-a sa tawo nga gustong modumala sa iglesia ni Ginoong Jesus Kristo.

- 2.** Unsay klaseng gasa nga gihatag ni Jesus Kristo sa iyang iglesia? (Efeso 4:11-12)

Mga apóstoles, propeta, evangelista, pastor ug magtutudlo maoy mga gasa nga iyang gihatag sa iglesia.

Unsay tumong ni Jesus sa paghatag niya niining mga gasa sa iyang iglesia?

Aron ang mga anak sa Dios makatuman sa pagkakristohanon nga buluhaton; kay kon mahitabo kini, motubu ang lawas ni Cristo.

Pero ayha kini mahitabo kon ang Iglesia sa Dios completo sa mga magtutudlu. Sama sa mga tanum nga dili motubu kon walay mo-atiman kanila, dili pod motubu ang lawas ni Cristo kon walay magtutudlo nga mo-atiman kaniya.

- 3.** Unsay gisulat ni Pablo bahin sa mga pangulu nga motudlu sa pulong sa Ginoo sa 1 Timoteo 5:17-18?

Angayan sila sa doble nga suhol ug dungog tungod sa ilang trabaho. Kay bug-at nga trabaho ang pagtudlu sa pulong sa Ginoo, ug sumala sa Kasulatan sa Deut 25:4 ug Lucas 10:7, ang trabante angayan sa iyang suhol.

Sumala ni Pablo, espesyal gayod kaayo ang trabaho sa tawo nga motudlo sa pulong sa Ginoo. Pero ayha siya angayan sa suhul ug sa dungog kon magmatinud-anon siya sa iyang katungdanan. Mao gayod nga gisulti ni Pablo, **“Ug buhata kining mga butanga sa matinud-anon gayod aron makita sa tanan ang imong pag-uswag”** (1 Tim 4:15); ug sa lain pang dapit, **“Paningkamoti pag-ayo nga ang Dios mahimuot kanimo ingon nga alagad nga walay angay ikaulaw”** (2 Timoteo 2:15); ug usab **“Pagkugi kanunay pagwali sa mensahe”** (2 Tim 4:2); ug sa makausa pa, **“Pakigambit sa mga pag-antos ingon nga maayong sundalo ni Cristo Jesus”** (2 Tim 2:3). Kon ingon niini ang kinaiya sa usa ka magtutudlo, angayan siyang pasidunggan.

4. Unsay nasulat sa Santiago 3:1 bahin sa magtutudlo?

Mas higpit ang paghukom sa Ginoo sa mga magtutudlo kay sa ubang mga alagad.

Lesson 4: Kinsay atong kinahanglang tudlu-an?

Tito 2: 2

Ang mga tigulang lalaki

Tito 2:3-5

Ang mga babayeng tigulang ug sila mismo ang kinahanglan motudlo sa mga batan-ong babaye.

Tito 2:6-8

Ang mga batan-ong lalaki pinaagi sa pulong ug panig-ingnan

Tito 2:9-10

Ang mga ulipon

Deuteronomio 4:9; 6:6-7; 11:19-21; 32:46

Ang mga bata; wala ang mga bata sa listahan ni Pablo sa Tito 2:1-10 kay nagtu-u siguro si Pablo nga tudluan ang mga bata sa ilang ginikanan sa balay.

Sumala niining mga bersikulu sa Tito ug sa Deuteronomio, claro gayod kaayo nga kinahanglang itudlo ang kamatuoran sa mga magtutudlu ngadto sa tanan klaseng tawo.

Gusto sa Ginoo nga ang tanan mga anak sa Dios magpamatuod sa kalibutan nga nausab ang ilang kinabuhi pinaagi sa Maayong Balita ug nagkinabuhi na sila nga diosnon. Mahimo lang kini kon adunay motudlo sa mga membro kon unsay hulagway sa kinabuhing matarong.

Lesson 5: Mga paagi sa pagtudlo ug ang pagandam

Basaha ang mga nagkalainlaing paagi sa pagtudlo ug pagpatudlo sa libro nga Buhat.

Buhat 2: 42-47

Nagtigom ang mga magtutu-u sa templo ug sa ilang puloy-anan. Gipaminaw nila ang gipanudlo sa mga apostoles.

Buhat 17:2, 16-18; 19:8-10

Nakiglantugi si Pablo sa sinagoga sa Tesalonica ug sa Atenas ug didto sa tigomanan sa Efeso

Buhat 17:3; 18:24-26

Nagpamatuod si Pablo sa Tesalonica ug si Priscila ug si Aquila nagpasabot sa kamatuoran kang Apolos.

Daghang paagi nga makatudlo ta sa pulong sa Ginoo; dili lang diha sa simbahan. Importanti nga andam kita pagtudlo o pagpasabot sa kamatuoran sa bisan asa kon taga-an kita ug higayon sa Ginoo.

Usahay wala tay panahon pagandam kon unsay atong itudlo. Pananglitan kon mohapit ta sa usa ka balay ug adunay mangutana kanato bahin sa Ginoo. Tungod kay higayon kini nga gihatag sa Ginoo, kinahanglang motubag ta sa ilang mga pangutana ug magpasabot ta sa pulong sa Ginoo.

Pero kon motudlo ta sa Domingo, aduna tay panahon pag-andam sa mensahe. Importante nga mohatag ta ug panahon para sa pag-andam.

Sa Jeremias 23:16-22, 32 nasuko man kaayo ang Ginoo sa mga propeta sa Juda kay bakak ang ilang gitudlo (v16); bunga lang daw sa ilang hunahuna (v16) ug dili pulong sa Ginoo. Kining mga propeta nanlakaw ug nanagna bisan wala sila sugua sa Ginoo (v21). Ang ilang gitudlo, sukwahi sa kabubut-on sa Ginoo. Gitudloan nila ang mga tawo nga wala mamati sa pulong sa Ginoo nga walay daotan ug walay katalagman nga modangat kanila (v17). Pagkatinuod, ang kasuko sa Ginoo sama sa bagyo nga hapit na mohapak sa ulo sa mga tawo nga masupilon (v19).

Ang mga tawo nga masinupakon wala makadungog sa pahimangno sa Ginoo kay ang gitudlo sa ilang mga propeta dili mao.

Ang hinungdan nga dili tinuod ang gitudlo sa mga propeta mao nga wala nila taga-i ug panahon ang pagpamati ug pagpamalandong sa pulong sa Ginoo (v 18). Kulang kaayo ang ilang pag-andam, ug tungod niana wala sila masayod kon unsay ipasulti sa Ginoo ngadto sa iyang katawhan.

Sa unsang paagi nga maka-andam ta sa atong kaugalingon para sa atong pagtudlo sa mga membro sa atong kasimbahanan?

ANG PASTOR UG MISYON

Lesson 1: Israel ug Misyon

Unsay tuyo sa Ginoo sa iyang pagtawag kang Abraham (Genesis 12:1-3)? Daghang siyag tuyo sa iyang pagpili kang Abr.

Gusto niyang panalangin si Abraham. Gisaad sa Ginoo nga taga-an niya si Abraham ug daghang kaliwat, aron mahimo silang dakong nasod. Taga-an pod sila sa Ginoo ug yuta nga ilang mapuy-an.

Gisulti pod sa Ginoo nga ang rasun nga iyang panalangin ang mga kaliwat ni Abraham mao nga, pinaagi kanila, panalangin sa Ginoo ang ubang katawhan sa kalibutan.

“Panalangin ko kadtong magapanalangin kanimo, apan tunglohon ko kadtong magtunglo kanimo. Pinaagi kanimo, panalangin ko ang tanang nasod sa kalibotan.” (Genesis 12:3)

Misyon ang tuyo sa Ginoo sa iyang pagpili sa Israel. Iya silang gipanalangin aron mahimo silang panalangin sa ubang nasod. Ang panalangin sa Ginoo dili lang para sa ilang kaugalingon; may tuyo sa panalangin.

Tan-awon pa nato ang mga bahin sa Bibliya diin makita nato nga misyon ang tuyo sa Ginoo sa iyang pagpili sa Israel.

Exodo 9: 13-16

1. Sumala sa v 14, unsay hinungdan nganong gipahamtang sa Ginoo ang iyang silot ngadto sa katawhan sa Ehipto?

Aron masayran sa mga tawo sa Ehipto nga walay laing dios sa kalibutan nga sama sa Ginoo.

2. Sumala sa v 16 unsa pay ubang hinungdan?

Gipahamtangan sa Ginoo ang mga Ehiptohanon aron mahibalo ang ubang mga katwahan sa kalibutan nga Ginoo ray Dios. Misyon ang hinungdan.

3. Natuman ba ang plano sa Ginoo? (Josue 2:8-11)

Natuman man. Kay pag-abot sa mga espiya nga gipadala ni Josue sa Jerico, ilang nakaplagnan nga nahadlok ang mga tawo sa Jerico sa mga Israelita kay nakabalita sila sa gibuhat sa Ginoo sa Ehipto.

Exodo 19:3-6

Giingon sa Ginoo nga ang nasod sa Israel maoy iyang piniling katawhan sa tibuok kalibotan. Ang pangandoy sa Ginoo mao nga moalagad sila kaniya, isip usa ka parianong nasod. Nganong ingon niini ang gisulti sa Ginoo?

Unsay trabaho sa mga pari sa nasod sa Israel? Sila ang nangalagad tali sa Ginoo ug sa katawhan sa Israel. Dili makaduol ang mga Israelita sa Ginoo kon walay pari kay ang mga pari ra ang makahalad sa mga hayop ngadto sa Ginoo. Dili pod makaduol ang Ginoo sa mga Israelita kon walay pari.

4. Unsay gipasabot sa Ginoo nga ang pagalagad sa mga Israelita sama sa pagalagad sa mga pari? (Exodo 19:6)

Nagbuot ang Ginoo nga ang Israel magpataliwala sa Ginoo ug sa ubang mga nasod sa kalibutan sama sa trabaho sa mga pari nga nagpataliwala sa Ginoo ug sa mga Israelita. Gusto sa Ginoo nga ang mga nasod nga wala pa maka-ila kaniya, makadu-ol kaniya pinaagi sa mga Israelita; gusto pod niya nga maka-ila ang mga ubang nasod kon unsay kinaiya sa Ginoo pinaagi sa mga Israelita.

Josue 4:23-24

5. Gipahubas sa Ginoo ang tubig sa Jordan aron makatabok ang mga Israelita sa suba ug maka-angkon sa yutang saad. Pero unsa pay gusto sa Ginoo nga mahitabo tungod sa iyang pagpahubas sa tubig?

Gipahubas pod sa Ginoo ang suba sa Jordan aron masayod ang tanang katawhan sa kalibutan nga gamhanan gayod ang Dios nga amahan sa mga Israelita. Misyon ang tuyo sa iyang pagpahubas sa tubig sa Jordan.

1 Hari 8:41-43**6.** Unsay gihangyo ni Solomon bahin sa Templo sa Jerusalem?

Gihangyo ni Solomon nga kon adunay tawo nga langyaw nga magbisita sa templo sa Jerusalem, nga buhaton sa Ginoo ang bisan unsay gi-ampo sa maong tawhana aron ang tanang katawhan sa kalibutan maka-ila sa Ginoo ug mahadlok kaniya.

Gusto ni Solomon nga ang templo sa mga Israelita mahimong tulay alang sa mga tawo nga wala pa maka-ila kaniya.

Sumala niining mga bersikulu, atong nasayran nga ang atong Ginoo nagpili sa Israel aron pinaagi sa Israel, ang tanang nasod sa kalibutan makaila nga siya lang usa ang Dios sa kalibutan. Misyon ang iyang tuyo sa Israel.

Lesson 2: Ang pagpadala sa Ginoo ni Jesus

Si Maria

Sa wala pa matawo si Jesus, gipahibalo sa anghel kang Maria nga manganak siya'g batang lalaki ug kinahanglang nganlan siyag Jesus (Lucas 1:31). Gisulti pod sa anghel kang Maria nga ang iyang anak mahimong hari sama sa iyang kagikan nga si David, ug maghari siya sa mga kaliwat ni Jacob hangtod sa kahangtoran (Lucas 1:32-33).

Ang gipahibalo sa anghel mao ang gipaabot sa mga Israelita bahin sa Mesiyas. Nasayod sila daan nga adunay umaabot nga kaliwat ni David nga mahimong hari sa Israel ug luwason niya ang Israel gikan sa ilang mga kaaway (Jeremias 23:5-6; Miqueas 5:2).

Basahon nato ang gikanta ni Maria sa dihang nahibalo siya sa gisaad sa Ginoo kaniya. (Lucas 1:54-55)

Nagtu-u si Maria nga ang iyang anak mahimong hari aron makatabang ug moluwas sa nasod sa Israel. Mao pod ang giawit ni Zacarias nga amahan ni Juan Bautismo (Lucas 1:68-74). Nagtu-u sila nga gipadala sa Ginoo ang Mesiyas para sa mga Judio.

Si Simeon

Pero sa dihang gihalad si Jesus sa iyang ginikanan sa Templo adunay gisulti sa usa ka tigulang nga si Simeon, nga gikahibulongan sa iyang ginikanan (Lucas 2:25-32).

Nahibulong sila kay gisulti sa tigulang nga ang ilang anak mahimong kaluwasan ug kahayag alang sa mga tawo nga dili Judio.

Si Juan Bautismo

Basahon pod nato ang gisulti ni Juan sa Lucas 3:3-6. Siya daw ang katumanan sa Isaias 40:3-5. Siya ang nagsinggit sa kamingawan aron mangandam ang mga tawo sa pagabot sa Ginoo. Kay kon moabot ang Ginoo ang tanang tawo sa kalibutan makakita sa kaluwasan sa Dios.

Nagtu-u si Juan nga ang mosunud kaniya mohatag ug kaluwasan sa tanang tawo sa Kalibutan, dili lang sa mga Judio.

Si Jesus

Lucas 4:14-30: Nganong nasuko kaayo ang mga tawo sa gitudlo ni Jesus sa sinagoga sa Nazaret (vv 28-30)?

Nasuko sila kay gidayeg ni Jesus ang pagtu-u sa tawo nga dili Judio. Dili sila makatu-u nga ang mga dili Judio maka-angkon ug kaluwasan. Nasuko pod sila kay murag na-insultohan sila sa gisaysay ni Jesus bahin sa biyuda sa Zarepat.

Si Jesus ug ang Romanhong opisyal

Lucas 7:1-10

Ang mga taga Roma maoy kaaway sa mga Judio; pero unsay gihukum ni Jesus bahin niining opisyal?

Gisulti ni Jesus nga wala pa siya sukad makakita ug pagtu-u nga sama sa pagtu-u sa opisyal nga taga Roma. Gihukum ni Jesus nga mas hugut ang pagtu-u sa opisyal kay sa pagtu-u sa mga Judio.

Ang kataposang pulong ni Jesus (Lucas 24:45-49)

Sa wala pa siya bayawa sa iyang amahan sa langit, gipasabot ni Jesus sa iyang mga tinun-an nga ang paghinulsol ug ang pagpasaylu sa sala kinahanglang isangyaw sa tanang nasod sa iyang ngalan. Gitin-aw na ni Jesus nga ang tuyo sa iyang pag-anhi sa kalibutan mao ang kaluwasan alang sa tanang katawhan.

Pero dugay nakasabot ang iyang mga tinun-an niini; naanad na sila sa mga doktrina sa mga Judio nga ang kaluwasan sa Mesiyas para lang sa mga kaliwat ni Abraham nga mao ang mga Judio. Wala silay pagpakabana sa mga tawo sa laing tribu.

Pangutana

Aduna bay ingon niini nga hunahuna sa mga kristohanon bahin sa mga tawo nga dili kristohanon?

Lesson 3: Ang misyon sa unang mga kristohanon

Sa Lucas 24:47 ug sa Mateo 28:19-20, gitudlo ni Jesus sa iyang mga tinun-an nga kinahanglang isangyaw sa iyang mga saksi ang kaluwasan sa tanang kanasoran sa kalibotan.

Sa Buhat 1:8, sa hapit na siya bayawa sa langit, gisulti niya sa iyang mga sakop nga mokunsad kanila ang Espiritu Santo aron mahimo silang iyang saksi sa Jerusalem, sa tibuok Judea ug Samaria ug sa tibuok kalibutan.

Ang kataposang mga pulong ni Jesus ngadto sa iyang mga sumusunod, bahin sa misyon nga iyang gisangon kanila. Dili siya gusto nga malimtan nila kining katungdanan.

Ang mga babag sa misyon sa unang iglesia

1. Ang mga Kristohanon nga nakalimot sa sugu sa Ginoo.

Kon basahon nato ang Buhat, ug inig-abot nato sa Kapitulo 8, didto pa gihapon sa Jerusalem ang mga kristohanon ug ang mga apostoles. Wala pa sila magmisyon sa laing dapit; wala pay simbahan sa ubang mga lungsud sa Judea ug sa Samaria.

Unsay gibuhat sa Ginoo aron mosugud ang mga kristohanon pagsangyaw sa laing dapit? (Buhat 7:54 – 8:5)

Gipalutos sila sa Ginoo pinaagi kang Saul. Mao hinungdan nga daghan sila mihawa sa Jerusalem ug nagsangyaw sila sa maayong balita samtang naglayas sila.

2. Ang pagsaway sa ubang kristohanon? (Buhat 10 – 11:18)

Nganong gisaway si Pedro sa mga magtutu-u sa Jerusalem?

Kay nagbisita siya ug nakigsalo siya sa mga tawo nga dili Judio

Unsay atong angayng buhaton aron dili mahawiran ang misyon sa Ginoo pinaagi sa pagsaway? (Buhat 11:23; 18:27; 1 Thesalonica 5:14)

3. Ang pagtamay sa laing cultura (Buhat 15:1-21)

Adunay mga kristohanon nga Judio, nga miadto sa Antioquia ug nanudlu sila sa mga kristohanon nga dili Judio nga dili sila maluwas kon dili sila magpatuli.

Nagkagubut ang mga iglesia tungod niini ug mitigom sila sa Jerusalem aron mahusay nila ang maong problema.

Unsay gisulti ni Pedro sa Council (Buhat 15:7-11)? Gisulti ni Pedro nga dili kinahanglan tulion ang mga kristohanon nga dili Judio tungod kay:

- a. Bisan wala sila matuli, nadawat gihapon sila sa Ginoo kay gihatagan sila sa Ginoo sa iyang Espiritu Santo
- b. Ang tawo nga tulion, kinahanglan motuman sa tibuok balaod (Roma 2:25). Ug matud pa ni Pedro, bug-at kaayo ni nga palas-anon nga bisan sila ug ang ilang katigulangan wala makahimo pagpas-an.

Unsay gisulti ni Santiago (15:13-21)? Gisulti niya nga gitagna sa mga propeta sa Ginoo nga maapil ang mga dii Judio sa plano sa Dios. Busa gitambag ni Santiago nga dili nila lisod-lisoron ang mga mga dili Judio nga midawat sa Ginoo. Kondili sulatan lang nila ang mga dili Judio nga likayan nila ang mga kinaiya nga makapandol sa mga Judio (15:20-21).

Unsaon man nato ni i-apply sa atong kahimtang karon?

Lesson 4: Ang kinaiya sa missionary

Tan-awon nato ang kinaiya ni Pablo nga atong makita sa iyang pagmisyon.

Kahingawa

Unsay gihunahuna ni Pablo bahin sa mga tawo nga nagsimba pa sa mga diosdios? (1 Cor 12:2; Galacia 4:9)

Mga ulipon sila sa mga diosdios

Unsay ilang kahimtang? (Efeso 2:12)

Mga tawo sila nga walay pagla-om

Unsay iyang gibuhad tungod sa kahimtang sa mga tawo? (2 Cor 5:20)

Gihangyo niya ang tanang tawo nga makiguli sila sa Ginoo

Pagpakabana sa katungdanan

Gisulat ni Pablo nga may katungdanan siya sa pagwali sa maayong balita.

“Kay may katungdanan ako alang sa tanang katawhan, sa mga Griego ug sa mga dili Griego, sa mga maalamon ug sa mga walay alamag. Busa dako kaayo ang akong tinguha sa pagwali usab sa MB nganha kaninyo nga nagpuyo sa Roma.” (Roma 1:14-15)

“Wala akoy katungod sa pagpasigarbo tungod lamang kay nagwali ako sa MB kay gisugu man ako sa pagbuhad niini. Alaot ako kon dili ako magsangyaw sa MB.” (1 Cor 9:16)

Dili gusto si Pablo nga masayangan ang Ginoo kaniya. Maoy hinungdan nga naningkamot siya pagkabig sa tawo (2 Cor 5:11)

Tungod kay nabug-atan siya sa iyang katungdanan, andam siya pagbuhad sa bisan unsa aron maluwas ang tawo (1 Cor 9:19-23). Likayan gayod ni Pablo ang bisan unsa nga makapandol sa tawo nga wala pa motuo kang Kristo.

Ang gugma ni Kristo

Gisulat ni Pablo sa Galacia 2:20 nga si Kristo **“nahigugma ug nagtugyan sa iyang kaugalingon alang kanako.”** Ug sa Roma 5:5, **“gibubo man sa Dios ang iyang gugma sulod sa atong mga kasingkasing.”**

Nasulat pod sa 2 Cor 5:14 nga giharian si Pablo sa gugma ni Kristo. Labaw sa tanan nagmisyon si Pablo tungod kay nadawat na niya ang gugma ug grasya ni Kristo. Ang iyang katungdanan, dili bug-at ug wala siya kapoya sa iyang katungdanan, kondili iyang giisip nga pribilihiyo.

“tungod sa pribilihiyo nga gihatag sa Dios kanako, gihimo akong sulugoon ni Kristo Jesus aron pagalagad sa mga dili Judio.” (Roma 15:15-16)

Lesson 5: Ang mga pagsulay sa atong misyon

Walay kwarta

Makalampos ba ta sa atong pagmisyon kon wala tay kwarta?

Daghang nagingon nga dili sila maka-awtrits kay walay support. Tinuod ba ni?

Tan-awon nato ang nahitabo sa Lucas 9:10-17

Unsay gipabuhay ni Jesus kanila? (9:13)

Gisugu niya ang iyang mga tinun-an sa pagpaka-on sa mga tawo

Unsay ilang gitubag sa iyang sugu? (9:13)

Gitubag nila nga wala silay mahimo kay gamay lang kaayo ang pagkaon nga ana-a sa ila. Sa ato pa, wala silay mahimo, kay wala silay kwarta.

Unsay kasulbaran sa situasyon?

Ang kasulbaran mao nga bisan gamay lang, igo gayod ang ilang pagka-on kay ilang gipagamit ang maong pagka-on kang Jesus. Sa ato pa, bisan gamay ang ato, magamit kini kon atong ihatag sa Ginoo.

Application sa atong kahimtang diri sa bukid.

Bisan wala kitay kwarta, magamit gihapon kita sa Ginoo kon itugyan nato ngadto sa Ginoo ang atong hiyas ug kinabuhi.

Lesson 6: Ang mga pagsulay sa atong misyon

Ang kahadlok

Sa Mateo 24:14 miingon si Jesus nga ang MB iwali ngadto sa tibuok kalibutan sa wala pa moabot ang kataposang adlaw. Tungod niini dili ta unta madiscourage, kay sumala sa Bibliya matuman ang plano sa Ginoo ug walay makababag sa iyang plano.

Pero, gisulti pod ni Jesus nga magwali sila sa MB sa taliwala sa grabeng paglutus. Dakpon ug patyon ang iyang mga tinun-an ug kasilagan sila sa tanang tawo. Managhan pod ang mga mini nga magtutudlo ug daghan ang malimbongan sa ilang pagtulon-an. (Markos 13:9-13)

Tungod sa paglutus, unsay buhaton sa ubang mga magtutu-u? Ngano man? (Mateo 24:12)

Mo-undang ang uban sa ilang pag-alagad sa Ginoo tungod sa kahadlok sa paglutus.

Unsay gitambag ni Jesus sa iyang mga sakop bahin sa paglutus? (Mateo 24:13; Markos 13:11, 13)

Gisulti ni Jesus nga ang mga sakop niya nga molahutay sa ilang pag-alagad maoy maluwas.

Wala moingon si Jesus nga dili ta puedeng mamakwit tungod sa paglutus. Naglayas ang mga kristohanon sa Jerusalem sa dihang gilutus sila ni Saulo (Buhat 8:1). Pagkahibalo ni Pablo nga nagkauyon ang mga tawo sa Iconio pagbato kaniya ug sa iyang mga kauban, naglayas sila ngadto sa Listra (Buhat 14:5-6). Mihawa pod sila sa Tesalonica ug sa Berea tungod sa gubut (Buhat 17:10, 14).

Pero may panahon nga bisan adunay tawo nga misupak sa iyang mensahe wala siya maglayas; nagpabilin siya hinuon sa pagtudlu sa pulong sa Dios. Sa didto na siya sa Corinto, ang Ginoo miingon kaniya, **"Ayaw kahadlok! Padayon sa pagwali kay ako naguban kanimo."** (Buhat 18:9-10)

Sa ato pa, depende sa panahon kon magpabilin ta o kun maglayas ta sa paglutus. Pero importante nga atong masabtan, nga dili ta unta moundang sa atong pag-alagad o sa atong pagsangyaw tungod sa gubut. Ang naglayas sa Jerusalem nagpadayon pagsangyaw sa mensahe. Paghawa ni Pablo sa Iconio, nagwali siya sa Listra (Buhat 14:7); paghawa niya sa Tesalonica, nagwali siya sa Berea, ug paghawa niya sa Berea, nagwali siya sa Atenas.

Sa ato pa, ang paglutus wala makapahunong sa pagkaylap sa pulong sa Ginoo. Pagkatinuod, makatabang hinuon ang paglutus sa misyon.

Pananglitan Buhat 16:16-34; Filipos 1:12-14.

Mga Sukaranan sa Ministry

Lesson 1: Ang Pulong sa Dios

Una sa tanan, ang pangulu sa simbahan maoy usa ka tawo nga moalagad sa Ginoo ubus sa pulong sa Ginoo. Ang pulong sa Dios maoy sukaranan sa tanan niyang buluhaton.

Ang atong Guide

Ang pulong sa Dios maoy atong guide (Salmo 119:105). Kong moadto ta sa usa ka lugar, pero wala pa ta sukad makatultul sa dalan, kinahanglang ta ug guide. Ang guide maoy mo-giya kanato. Kinahanglang magpaubus ta sa guide ug dili ta maka-abot sa atong adtuan kong supakon nato ang guide. Labaw ang guide.

Sa unsang paagi nga ang pulong sa Dios ang atong guide?

1. Salmo 119:9-11

Makalikay kita sa dautan pinaagi sa pulong sa Ginoo

2. 2 Timoteo 3:16; Mateo 22:23-33

Ang pulong sa Ginoo maoy atong guide aron mahibalo ta kon unsay atong itudlo sa mga membro sa simbahan. Mahibalo pod ta kon unsay tinuod o dili tinuod.

Ang atong Kusog

Ang pulong sa Dios maoy atong kusog. Nasulat sa Salmo 119:92, **“Kon ang imong pulong dili pa maoy tinubdan sa akong kalipay, namatay na unta ako tungod sa akong mga pagantos.”** Makapalig-on kanato ang pulong sa Dios kay molungtad nga walay kataposan (Salmo 119:89,160; Isaias 40:8; Mateo 24:35)

Ang motukod ug balay mangita ug materiales nga lig-on; kay kon lig-on ang kahoy dugay kaayong magabok; kon lig-on ang cemento, dugay kaayong madaot. Molungtad ang balay kon lig-on ang materiales ug lig-on ang sukaranan.

Makabarog ta nga lig-on bisan ana-a ta sa taliwala sa mga pag-antos tungod sa pulong sa Dios (Salmo 119:23).

Nganong may kadaugan ang mga unang Cristohanon sa Jerusalem samtang nagantos sila? (Buhat 4:23-31)

May kadaugan sila kay gipamalandongan nila ang pulong sa Ginoo ug mao kini ang nakapalig-on sa ilang pag-alagad.

Ang atong Hinagiban

Ang pulong sa Dios maoy atong hinagiban (Efeso 6:17). Sumala niining bersikulu, sama sa espada ang pulong sa Dios. Ang iyang pulong maoy atong itigbas sa atong kaaway panahon nga nadiscorahe ta o kon moatubang ta sa mga tintasyon ni Satanas.

Basahon nato ang gibuhat ni Jesus sa Mateo 4:1-11

Ang atong Kalipay

Ang pulong sa Dios maoy atong kalipay (Salmo 119:14, 16, 24, 35, 47, 70, 77, 92, 143, 174). Sayon ta motu-u nga ang kasulatan maoy atong guide, atong kusog ug atong hinagiban; pero panagsa lang nato isipon nga ang pulong sa Dios ang atong kalipay. Pero kana ang gisulat sa usa tawo ug makadaghan sa Salmo 119. Giingon pod niya nga nahigugma siya sa balaod sa Dios (119:48, 97) ug alang kaniya mas bililhon ang pulong sa Dios kay sa bulawan (119:72), ug mas tam-is kay sa dugos (119:103).

Sa unsang paagi nga ang pulong sa Dios maoy atong kalipay?

Kay pinaagi sa pulong sa Ginoo mahibalo ta kon unsay tinuod ug unsay dili tinuod. Ang anak sa Dios malipay sa kamatuoran

Malipay kita kon ang atong mga anak motuman sa pulong sa Ginoo

Ang pulong sa Ginoo maoy makatagbaw sa atong kagutom

Obligasyon sa tanang Cristohanon ug labi na sa mga pangulu nga mo-alagad sila ubus sa pulong sa Ginoo.

Lesson 2: Kinahanglang motarong ug dumala (1 Samuel 15)

Maayo ang sinugdanan sa paghari ni Saul. Guapo siya ug dili mapahitas-on (1 Sam 10:20-24). Giluwas pod niya ang mga tawo sa Jabesgilead gikan sa ilang mga kaaway (1 Samuel 11:1-11). Pero dinhi sa 1 Samuel 15, makita nato ang mga kinaiya nga nakadaot sa iyang paghari sa Israel.

Gisugo si Saul sa Ginoo pinaagi kang Samuel pag-ataki sa mga taga Amalek. Gisugo sa Ginoo nga kinahanglang hutdon niya'g patay ang mga tawo sa Amalek, lakip ang mga hayop (1 Sam 15:3).

1. Pero Unsay gibuhat ni Saul (15:7-9)?

Wala niya ipapatay ang hari sa Amalek ug ang mga tambok nga hayop.

Gipadayag sa Ginoo kang Samuel ang gibuhat ni Saul ug giingon sa Ginoo nga nagbasol siya nga iyang gihimo si Saul nga hari. Busa miadto si Samuel kang Saul.

2. Unsay gisulti ni Saul kang Samuel (15:13)?

Namakak siya kang Samuel kay wala niya tumana ang gisugu sa Ginoo kaniya.

3. Sumala ni Samuel, unsay problema ni Saul (15:17)?

Kaniadto, nakasabot si Saul sa iyang kaiwit, nga dili siya angayan nga mahimong hari. Pero pagkakaran, andam siya pagpamakak sa propeta sa Ginoo ug gusto lang niyang buhaton ang iyahang gusto.

4. Unsa konoy hinungdan nganong wala nila hutda pagpatay ang mga hayop (15:20-21)?

Gikatarungan ni Saul nga alang sa Ginoo ang mga hayop. Giapil niya ang Ginoo sa iyang pagsupak sa Ginoo.

Ang Ginoo daw hinungdan nganong gisupak niya ang Ginoo. Usahay mangatarungan ang pangulu nga gibuhat niya ang dili maayo tungod sa iyang pagalagad sa Ginoo.

5. Pero unsay gitubag ni Samuel (15:22)?

Mas malipayon ang Ginoo sa atong pagtuman sa iyang sugu kay sa paghalad.

6. Unsa pay katarungan nga gisupak ni Saul ang Ginoo (15:24)

Nahadlok siya sa mga kauban niyang tawo nga Israelita. Iya silang gibasol nganong wala niya tumana ang Ginoo.

Usahay kana ang kinaiya sa mga pangulu sa simbahan. Imbis nga moangkon sila sa ilang sala o sa ilang sayop, basolon lang nila ang mga membro.

7. Unsay labaw sa hunahuna ni Saul (15:30-31)?

Labaw sa tanan, gusto niya nga pasidunggan siya sa mga tawo. Nahadlok siya nga pakaulawan siya atubangan sa ubang mga pangulu sa Israel.

May kalamposan sa sinugdanan sa pagkahari ni Saul, pero kapakyasan na lang sa kataposan. Sa lesson 1 atong nakaplagaan nga ubus man unta ang pangulu sa pulong sa Ginoo. Pero nagpalabaw hinuon si Saul sa pulong sa Dios. Abi niya nga mas maalamon ang iyang plano kay sa sugu sa Ginoo ug abi niya nga matabonan niya ang iyang sala sa mga bakak. Naulaw siyang moangkon sa iyang sayop, busa iyang gikatarungan nga bisan nasayop siya, maayo ang tuyo. Ug dugang pa niana, iyang gibasol ang iyang mga sakop nga maoy hinungdan nga nakasala siya sa Ginoo. Mas nahadlok si Saul sa tawo kay sa Ginoo.

Lesson 3: Ang pagdihog sa Espiritu Santo

Sa wala pa siya mosugud sa iyang ministry, gikunsaran si Jesus sa ES (Lucas 3:21-22). Nasulat pod sa Lucas 4:1 nga puno siya sa ES sa dihang gidala siya sa ES sa kamingawan aron tintalon sa yawa. Human siya tintala sa yawa, mipauli siya sa Galilea uban sa gahom sa ES (Lucas 4:14).

Sa diha na siya sa sinagoga sa Nazaret, iyang gitudlo sa mga tawo nga ang Espiritu sa Ginoo ana-a sa iya ug gidihogan siya sa ES aron makasangyaw siya sa MB (Lucas 4:18).

Kon gikinahanglan ni Jesus ang ES sa iyang ministry, kita pa man kaha nagkinahanglan sa ES.

Alang sa tanan ang Espiritu Santo

Sa wala pa siya bayawa sa langit, gisaad ni Jesus sa mga apostoles nga mokunsad kanila ang gahom sa Ginoo nga mao ang ES (Lucas 24:49; Buhat 1:8).

Gisulti ni Pablo nga pinaagi sa ES nakigambit ta sa lawas ni Cristo (1 Corinto 12:13), ug pinaagi sab sa ES aduna tay bag-ong kinabuhi (Roma 8:11). Sa ato pa, pinaagi sa ES mahimo tang membro sa lawas ni Cristo.

Pero magkinahanglan pa man ang pangulu sa ES aron:

1. Aron mahimong diosnon ang kinaiya sa pangulu. Nahibalo ta nga kinahanglan dili masaway ang pangulu sa iglesia. Dili kini mahimo kon dili siya puno sa ES. Si Esteban ug si Bernabe, puno sa ES (Buhat 6:5; 11:24). Kaniadto, murag dili nila piyalan ug katungdanan ang tawo kon dili puno sa ES. Gisulat pod ni Pablo nga kinahanglang paharion nato ang ES sa atong kinabuhi (Galacia 5:25) ug tinguhaon nga mapuno ta sa ES (Efeso 5:18).
2. Aron maka-antus ta sa mga kalisdanan. Basahon nato ang Buhat 4:8-13. Tungod kay napuno si Pedro sa ES nakatubag siya sa mga tawo nga midakop kanila. Basahon pod nato ang Buhat 4:18-31. Sa dihang gipahibalo sa mga Judio nga 'illegal' na ang pagwali sa mga apostoles sa ngalan ni Jesus, nanguli sila Pedro ug ilang gisugilon sa ilang mga isigka-magtutu-u ang tanang gipanghulga sa mga Judio. Naghangyo silang tanan sa Ginoo nga hatagan silag kaisog aron makapadayon sila pagsangyaw sa iyang mensahe (4:29). Human sila magampo, napuno silang tanan sa ES ug sa walay kahadlok nagwali sila sa mensahe (4:31).

Husto ang gibuhay sa mga Cristohanon niadtong panahona bisan may nagbabag sa ilang ministry. Usahay dili husto ang atong reaksyon kon atubangon nato ang mga problema tungod kay dili ta puno sa ES.

Unsa man usahay ang atong reaksyon kon adunay katalagman nga modangat sa atua?

3. Aron maka-agi ang iyang mga sulugoon sa kamatayon nga walay kahadlok (Buhat 7:54-60). Gidihogan si Esteban sa ES aron maka-agi siya sa kamatayon. Tungod kay napuno siya sa ES, nakita niya ang himaya sa Dios. Nakita niya si Jesus nga nagtindog sa tuo sa Dios. Hinungdan nga namatay siya sa walay kahadlok. Sa walay kapungot nagampo lang siya sa mga tawo nga nagbato kaniya.
4. Aron makabadlong sa tawo nga misupak sa kabubut-on sa Ginoo (Buhat 13:4-12).Usahay adunay panahon nga kinahanglang badlongon sa pangulu ang tawo. Usahay, kon dili ta puno sa ES dili biblical ang atong pagbadlong. Imbis nga mosulbad sa problema, modugang hinuon ang atong pagbadlong sa problema. Kon puno ta sa ES, makapugong ta sa kaugalingon.

Unsay atong puedeng buhaton aron mapuno ta sa ES?

Efeso 4:30-32:

Sensitibo ang ES ug dili siya magpuyo sa simbahan diin adunay kasuko, kayugot ug kaligutgut. Mapuno ta sa ES kon mawala kining mga kinaiya sa atong simbahan ug kon magpinasaylu-ay kita ug maghinigugma-ay.

Lucas 11:5-17

Sumala sa gitudlo ni Jesus niining samingay, impossible nga dili mohatag ang amahan sa ES ngadto sa tawo nga mangayo kaniya. Kay siya ang buotan kaayo nga amahan nga gustong mohatag ug maayo sa iyang mga anak.

Usaha yang atong problema mao nga wala ang ES sa atong kinabuhi tungod kay dili ta mangayo niini sa atong amahan.

Lesson 4: Pag-ampo (A)

Pagampo nga tinagu

Nasulat sa Marcos 1:35 nga mibangon si Jesus sa kaadlawon pa, migawas siya sa balay ug miadto sa usa ka dapit nga mingaw aron mag-ampo. Gusto niya nga dili siya madisturbo sa tawo. Murag nabatasan ni Jesus ang pagadto sa dapit nga hilit aron magampo. Sa Lucas 6:12 mabasa nato nga nagampo siya sa usa ka bungtod sa tibuok gabi-i. Nasulat pod sa Lucas 22:39 nga miadto siya sa Bungtod sa mga Olibo sumala sa iyang nabatasan. Kanunay si Jesus mangita ug lugar nga walay tawo aron maginusara siya nga magampo.

Importante kang Jesus ang tinagu nga pagampo ug gitudluan pod niya ang iyang mga tinunan sa pagampo sa samang paagi (Mateo 6:6)

Ngano man nga importanti kaayo, alang sa Cristohanon, ang tinagung pagampo?

Aron makigsu-ud ta sa Ginoo

Aron makatug-an ta sa tinuod diha sa Ginoo

Makadungog ta sa iyang tingog kon walay laing tawo

Trabaho ang pagampo

Basahon nato kon unsay gibuhath ni Jesus sa Marcos 1:21-38; 6:30-46. Duha ka punto nga importanti niining mga bersikulu.

1. Niadtong duha ka panahona, busy kaayo si Jesus, ug daghan siyag giatiman nga tawo. Pero bisan gikapoy pa gani siya, imbis magpahulay, nagampo hinuon siya.
2. Bisan daghang tawo nga nangita kaniya, wala man niya sila tagda tungod sa pagampo.

Nganong ingon niana ang gibuhath ni Jesus?

Kay ang pag-ampo maoy pinaka-unang katungdanan niya

Sa Buhat 6:1-4 adunay mga biyuda nga Cristohanon sa simbahan sa Jerusalem nga nakabsan ug pagkaon. Ang katungdanan sa pagatiman sa mga biyuda gisangon sa mga apostoles ngadto sa 7 ka tawo nga gipili sa mga membro sa Jerusalem. Nganong gipiyal kining katungdanan sa mga apostoles ngadto sa laing tawo. Nganong dili sila ang miatiman sa mga biyuda? (Buhat 6:2,4)

Kay ang pagwali ug ang pagampo maoy labaw nga katungdanan nila. Mabungkag ang ilang ministry kong minus ang panahon sa pagampo.

Gi-unsa paghulagway ni Pablo ang pag-ampo ni Epafras alang sa mga taga Colosas (Colosas 4:12-13)

Naghago si Epafras alang kanila. Tinuod nga trabaho ang pag-ampo.

- Nasulat sa Bibliya nga nag-ampo si Jesus sa mga mahinungdanong panahon sa iyang ministry.
- Nagampo siya samtang mikunsad kaniya ang ES (Lucas 3:21)
- Sa wala pa siya mosugud sa iyang ministry nagpuasa ug nag-ampo siya sulud sa 40 ka adlaw (Mateo 4:2)
- Nag-ampo siya, usa siya nagpili sa iyang 12 ka apostoles (Lucas 6:12-13)
- Nag-ampo siya usa siya nagpahibalo sa iyang mga sakop nga kinahanglang mag-antos siya, patyon ug banhawon (Lucas 9:18-27)
- Sa duol na ang panahon nga dakpon siya sa mga sundalo, nag-ampo siya (Marcos 14:32-36)

Unsay atong mga importanti nga buluhaton nga kinahanglang itugyan nato sa Ginoo pinaagi sa pag-ampo.

Lesson 5: Pag-ampo (B)

Unsay atong i-ampo?

Pagpasalamat.

Nagpasalamat si Jesus sa pan nga iyang gipakaon sa 5,000 ka tawo (Marcos 6:41), ug sa pagpakaon niya sa 4,000 ka tawo (Mateo 5:36), ug sa ubang panahon (Mateo 26:27; Lucas 24:30). Nagpasalamat pod siya tungod kay gipadayag sa iyang amahan ang kamatuoran ngadto sa mga tawo nga walay kahibalo (Mateo 11:25-26).

Sa mga sinulat ni Pablo, nagpasalamat siya sa Ginoo, sa makapulu, tungod sa pagtu-u ug sa pagalagad sa mga tawo nga iyang gisulatan (Roma 1:8; 1 Cor 1:4-9; Efeso 1:16; Colosas 1:3-4; 1 Tesalonica 1:2-4; 2:13; 2 Tes 1:3-4; 2:13-14; 2 Tim 1:2-3; Philem 4). Gisulat ni Pablo nga angay kitang magpasalamat sa Ginoo, bisan unsay modangat kanato (1 Tes 5:18)

Nganong importanti ang pagpasalamat sa atong pag-ampo?

Pag-ampo alang sa kaugalingon

Nag-ampo si Jesus sa iyang kaugalingon sa hapit na siya magpakamatay sa krus

“Nabalaka ako ug unsa may akong isulti? Moingon ba ako, ‘Amahan, ayaw ipadangat kanako kining taknaa’? Dili kay ang hinungdan sa akong paganhi mao ang pagdawat niining takna sa pag-antos. Amahan pasidunggi ang imong ngalan.”
(Juan 12:27-28)

“Amahan, miabot na ang takna. Ipadayag ang himaya sa imong Anak aron ipadayag sa Anak ang imong himaya kay gihatagan mo siyag katungod ibabaw sa tanang tawo aron hatagan niyag kinabuhing dayon ang tanan nga imong gitugyan kaniya.”
(Juan 17:1-2)

“ Amahan ko, mahimo mo ang tanan. Kuhaa kining kupa gikan kanako. Apan dili ang akong pagbuot maoy matuman kondili imo.” (Marcos 14:36)

Sa mga adlaw sa tawhanong pagkinabuhi ni Jesus, nag-ampo ug nangaliyupo siya uban sa makusog nga pagtuaw ug mga luha ngadto sa Dios nga may gahom sa pagluwas kaniya sa kamatayon. (Hebreo 5:7)

Sa dihang duol na ang iyang kamatayon maoy panahon nga gitintal siya nga mainiton ni Satanas sa pagsupak sa kabubut-on sa iyang amahan.

Unsay gisulti ni Jesus kang Pedro (Marcos 14:37-38)

Pagtukaw ug pag-ampo aron dili kamo madaug sa panulay

Nakadaug ba si Pedro sa pagsulay o nadaug ba siya? (Marcos 14:66-72)

Nadaug si Pedro kay iyang gilimod si Jesus. Napildi siya sa Getsemane diin natulog siya imbis nag-ampo.

Pinaagi sa pagbantay ug sa pag-ampo makadaug ta sa mga tintasyon ni Satanas.

Pag-ampo alang sa uban

Miingon si Jesus kang Pedro nga nag-ampo siya kaniya aron dili mapakyas ang iyang pagtu-u (Lucas 22:32). Nag-ampo si Jesus sa iyang mga tinun-an (Juan 17:9) ug sa mga tawo nga motu-o pinaagi sa ilang mensahe (Juan 17:20). Nag-ampo si Pablo sa tanang mga iglesia nga iyang gisulatan ug nag-ampo siya, adlaw ug gabi-i, kang Timoteo (2 Tim 1:3).

Unsay maangkon sa mga anak sa Ginoo pinaagi sa pag-ampo sa ilang isigka-magtutu-u?

Exodo 17:8-13:

Makada-ug sila sa ilang kaaway pinaagi sa pag-ampo sa ilang mga leaders

2 Corinto 1:10-11; 2 Tesalonica 3:2:

Maluwas ang mga Cristohanon sa mga katalagman

Colosas 4:3; 2 Tes 3:1:

Mokaylap ang pulong sa Ginoo ug pasidunggan pinaagi sa pag-ampo

Colosas 1:9-10:

Motubu ang pagtu-u ug kahibalo sa mga Cristohanon. Mahamtung sila pinaagi sa pag-ampo

Labaw sa tanan, gikinahanglan sa membro sa atong kaiglesiahan ang mga pag-ampo sa ilang mga pangulu. Taas kaayo ang panahon nga gigahin ni Jesus ug sa mga apostoles alang sa mga magtutu-u nga gipiyal sa Ginoo kanila.

Sigurado gayod nga motubag ang Ginoo sa pag-ampo sa mga tawo nga mag-ampo nga malahutayon pinaagi sa gahom sa ES (Efeso 6:18)

Lesson 6: Alagad sa Maayong Balita

“Sa dihang nabilanggo na si Juan, miadto si Jesus sa Galilea ug nagsangyaw sa MB sa Dios. Miingon siya, “Miabot na gayod ang panahon nga maghari na ang Dios! Busa hinulsoli ug biyai ang inyong mga sala ug tuohi ninyo ang MB.” (Marcos 1:14-15)

Si Jesus ang atong manluluwas ug manluluwas sa tanang tawo. Siya lang ang makaluwas sa tawo ug siya lang ang makausab sa ilang kinabuhi. Dili ta maka-awat kang Jesus sa iyang pagluwas sa tawo; makahangyo na lang ta sa mga tawo nga motu-o sila kaniya aron maluwas sila. Pero sa ubang buluhaton ni Jesus siya ang atong panag-ingnan ug makasundog ta kaniya, kay miingon siya “Naghatag ako kaninyo ug panag-ingnan aron inyong buhaton ang gibuhad ko kaninyo.” (Juan 13:15)

Usa ka alagad pod si Jesus sa Maayong Balita, ug kana pod ang katungdanan sa iyang mga sumusunud, labi na sa mga pangulu sa iyang mga iglesia. Tun-an nato ang iyang gisulti sa Marcos 1: 15 aron ika-apply pod nato sa atong kinabuhi ug aron mahimo pod kitang maayong alagad sa MB.

1. Gipahibalo ni Jesus nga “miabot na ang panahon...” Kini ang panahon nga gitagna sa mga propeta kaniadto. Kini ang panahon nga gipaabot sa mga diosnon nga tawo sama kang Simeon (Lucas 2:25-32). Daghang tawo ngs naglaom nga makasinati sila sa maong panahona pero wala sila makasinati kay namatay na man sila.

“Miingon si Jesus, “Apan kamo, pagkabulahan ninyo! Kay makakita ang inyong mga mata ug makadungog ang inyong mga dalunggan. Sultihan ko kamo sa tinuod; daghang mga propeta ug daghang mga tawo sa Dios nga buot gayod unta motan-aw sa inyong nakita apan wala sila makakita ug gusto untang mamati sa inyong nadungog apan wala sila makabati.” (Mateo 13:16-17)

Giingon ni Pablo, “Mao na kini ang takna sa pagdawat sa kaluoy sa Dios. Karon mao ang adlaw sa kaluwasan.” (2 Cor 6:2) Ang buot gipasabot ni Pablo mao nga karon na ang panahon nga makadawat ang mga taga Corinto sa MB kay ang pulong sa Ginoo miabot na kanila.

Sama kang Jesus, makapahibalo pod ta sa mga tawo nga miabot na ang panahon alang kanila.

Karon na gayod ang panahon nga makadawat sa MB ang mga tribo sa Mindanao. Busa kita ang makapahibalo sa atong mga isigka-dugo nga miabot na ang panahon alang kanila.

2. Maghari na ang Dios... Hangtud sa pagabot ni Jesus, si Satanas ang nagmando sa kalibotan (Juan 12:31). Pero pinaagi kang Jesus, ang Dios miangkon nga siya na ang tinuod nga hari sa Israel ug sa tibuk kalibotan, ug miabot na siya pagbawi sa tanan nga iyaha ug buntogon niya ang paghari sa iyang kaaway (Lucas 11:20; 1 Juan 3:8).

3. Giingon pod ni Jesus, “Hinulsoli ug biya-i ang inyong mga sala...” Kini ang buhaton sa tawo aron mahimo silang sakop sa bag-ong hari.

Kon magpasakop ta sa Ginoo, biya-an nato ang atong da-an nga kinabuhi. Dili na ta magpahuyon sa kalibutan. Sumala ni Jesus kinahanglang magpaubus ta sa atong kaugalingon ug magpakasama sa bata (Mateo 18:2-4).

Unsay gitudlo ni Juan bahin sa paghinulsol (Lucas 3:7-14)? I-apply sa inyong kinabuhi.

Importanti kaayo nga ang bunga sa paghinulsol makita sa atong kinabuhi (v 8) Unsa nga bunga?

- *Kaluoy alang sa mga pobre (v 11)*
- *Matarong ang kinaiya; walay kurakot sa kinabuhi (vv 12-13)*
- *Dili mag-abusar ug dili magpasangil sa atong isigkatawo (v 14)*

Unsay gitudlo ni Jesus bahin sa paghinulsol? (Lucas 18:18-25)

Walay labaw kang Jesus sa atong kinabuhi

Giklaro ni Juan ug ni Jesus kon unsa man ang mag sala nga kinahanglang biya-an sa mga tawo nga ilang gisangyawan. Murag walay pulus kong isulti lang nato, “biya-i ang inyong mga sala” pero dili nato i-klaro kon unsay sala.

4. “Ug tuhi ninyo ang Maayong Balita.” Kini ang pikas bahin sa paghinulsol. Kon maghinulsol, aduna tay biya-an. Kong motuo ta, adunay tay higugmaon, aduna tay sundon. Si Jesus ang Maayong Balita kay siya ang bag-ong hari nga nagsugud pagmando dinhi sa kalibutan. Bisan daghan gihapon ang atong makita nga dautan, mituo gihapon ta nga adunay umaabot nga adlaw nga usbon niya ang tanan ug ang tanang tawo sa kalibutan mangluhud sa iyang atubangan un magpasidungog sa iyang ngalan.